

私奔
皇后

紅拂集

廣益書局刊行



附

方今文化日新。文學之範圍日廣。若古本說部諸書。文
顯明。流傳既徧。因勢利導。足以灌輸社會。促進文化。
故新舊說部。在今日文學界中。實爲需要。惜乎一般刊
本。字句舛誤。繡像俗陋。且將內容刪割割裂。藉此減縮
篇幅。貶價出售。漁利競爭。誑騙讀者。莫此爲甚。本局
深恨此種行爲。願以闡揚文化。提倡普及教育。爲出版業
之天職。故於刊行古本說部諸書。莫不整理精細。考究完
整。實事求是。向爲讀者所贊許。本局以優美之書籍。取
最低廉之代價。原爲助導文化。推廣流通。區區之忱。惟
希公鑒。

誌



A541 212 0022 1010B

紅拂集自序

世傳虬髯客傳。或稱張說。或題杜光庭。大抵皆屬僞託。莫詳出誰手。宋范公偁過庭錄所載黃鬚翁傳。似差可信。惟云於汴州見太宗。殊紕謬。文亦不似唐人。三國志崔琰傳注。虬鬚直視。酉陽雜俎。太宗虬鬚。劍俠傳虬鬚叟。老杜八哀詩。虬鬚似太宗。皆作鬚不作髯。作髯者確為唐宋後人所竄亂。以吾觀之。李靖有桑中之約。遇黃鬚翁事。自來相傳如是。其他云云。俱出元人劇本傳會焉耳。史言楊虛道性疏。高下在心。朝臣之內。頗推高頴。敬牛弘。厚接薛道衡。視蘇威蔑如也。自餘朝貴。多被陵轢。家僮數千。後庭妓妾。曳綺羅者以千數。觀其素來驕貴。踞見英雄。自屬意中事。不知史正言李靖初見楊素。即有拊牀推坐之目。安所謂踞見。王仲瞿詩云。唐書兩種難憑信。况且虞初九百篇。其語洵然。夫以李靖之才。唐高祖不能知而憐也。惟太宗許紹保惜之。唐初稱臣於突厥。至靖乃以輕騎三千。深入虜廷。奇恥始雪。人之言曰。兵良師衆。方克禦侮。由靖以觀。祇須一枝之軍。一將之勇。亦足以震驚世界。奚須傾國哉。靖壽七十有九。或云不壽。終及晚年修道者。皆稗乘之言。不見正傳。史稱尉遲忠武篤信仙方。飛鍊金石。則修道者敬德也。溫彥博高甄生唐奉義之徒。專以賊忌才能誣害忠良為職志。智出於婦人下矣。民八夏五。予得吾邑鍾際唐

紅拂集 自序

1568495

孝廉所繪紅拂圖。徵題迄今。已閱十八年矣。或畢刪。或摘錄。或廿取一而十取五焉。僅獲二百七十餘家。詩數百篇。雖萬首之願難償。而書成非一朝一夕之功。讀者當能諒及。是編都四卷。首紅拂偶錄一卷。皆輯古今人所述紅拂事。溯源也。次圖詠分上下二卷。殿以拙撰紅拂詩話一卷。乃所以貫穿各篇。包舉全書。誠不辭蠡測管窺之誚。聊助餘興而已。人以錢求利。尙且失之。况欲以渺渺之軀。藐藐之才。求知於天下乎。是故天下祇有熱場結識。安有所謂風塵知己。風塵知己。偏逢女俠。談何容易。夢之也難。吾儕惟結習難忘。讀書爲佳。當求之於千載之上。千載之下。以尋其故紙堆中生活。謝絕浮光俗譽。第恨少知人之學。豈患人之不己知哉。或云李百藥字重規。隋內史令德林子。隋唐嘉話所載百藥事。訛爲藥師。王深寧已斥其謬。昔人謂隨清娛墓碑致可疑。不應以龍門令侍姬之芳名。磨滅於千百載前。待褚學士而銘幽洵有之。彼貞觀文人。宜同聲歌詠其事。何復埋沒於千百載後。至明始流傳人間。紅拂事將毋同。惟其爲憐才於風塵中。雖古今人明知其妄。而仍豔羨之丹青之歌詠之不少已。想望千秋。庶幾一遇。得毋太癡歟。陳眉公曰。憐才二字。我不喜聞。才者當憐人。寧爲人所憐。此言實獲我心。士恆憐衆人。衆人不之知。才人固無有見而憐之者。惟才者始憐才者。亦惟才者始敬才者。衆人之愛才者。祇可名之以憐而未能敬也。是以男子憐才之名。雖美而尙未美。惟古今來女子憐才之事。差可尋味耳。予謂士固願憐衆人。不欲

憐美人才人。設遇美人才人。必禮而敬之。烏所謂憐。若夫美人遲暮。將軍老去。名士病癘。縱欲憐之。安得而憐之。當亦不蒙其憐矣。故人苟不於青年立功名。建奇策。顯父母。至於齒豁頭童。身殘才盡。力絀心長。途窮日暮。尙安所希冀。蓋一讀予所編紅拂集。轉大可氣吐眉揚。而自慰以慰人。

民國二十六年丁丑四月南匯朱太忙撰文

紅拂集目錄

紅拂圖

鍾斯威

紅拂集自序

朱惟公

卷一

【紅拂偶錄】

唐代叢書	一
池北偶談	五
茶香室叢鈔	五
讀書敏求記	六
柳南隨筆	六
小浮梅閒說	七
花朝生筆記	七
高青邱集	八
六如居士全集	八
明末四百家遺民詩	八
梅村集	九

百美新詠	九
烟霞萬古樓詩集	九
古艷樂府	一
吳淞草堂詩稿	一
瓶水齋詩集	一
寒松閣詩集	二
炊黃子松風集	二
書船庸談	三
長真閣詩集	三
自然好學齋詩鈔	四
名姝百詠	四
慧福樓幸草	五
五百石洞天揮麈	五
閒情十二懽	五
隋唐嘉話	五

美人譜	一六
二黃尋聲譜	一六
麗情集	一六
戲瑕	一七
楊了公先生詩集	一七
徵題紅拂圖	一七
自題紅拂圖	鍾斯威
徵詩題句	朱惟公
續題	
卷二	
紅拂圖題詠集序	韓道明
題詞	賈鎔等
【紅拂圖詠上】	
丁柏坪	一
丁兆松	一

于干	一
孔祥百	二
孔慶徵	二
毛文沂	二
方德	二
王淳澄	二
王寅斗	三
王麟書	三
王啓懷	三
王育磨	三
王家彥	四
王逸	四
王乃屏	四
王雪禪	五
王仁溥	五
王恆清	五
王巖	五

史遠峴	五
田興奎	六
田攬芸	六
朱翰臣	六
朱家驊	七
朱家駒	七
朱雲櫺	一〇
朱聲韶	一〇
朱壽延	一〇
朱寶田	一一
何煥華	一一
何國瑾	一一
余綯	一二
余靜超	一三
吳恭亨	一三
吳師善	一三
呂鑑秋	一三

宋攀桂	一四
李石鈞	一四
李鏡熙	一四
李慎維	一五
李親仁	一五
李嘉禾	一五
李維藩	一六
李棟	一六
李實蕃	一六
杜運昌	一六
杜邁遠	一七
汪劍鳳	一七
沈其光	一七
沈欽文	一八
沈昌眉	一八
沈舉清	一八
沈中路	一八

卓堅……………一九

周葆貽……………一九

周龍章……………一九

周瑾……………二〇

宗威……………二〇

松厂山人……………二〇

林百舉……………二一

林步蟾……………二一

林之美……………二一

林維周……………二二

林維朝……………二二

邵景毅……………二二

金榜……………二二

金大勳……………二三

金繼文……………二三

侯大章……………二三

俞壽嵩……………二三

俞琴……………二三

姚永年……………二四

姚巍……………二四

姚行沂……………二四

姜景伯……………二四

施民佑……………二四

柳棄疾……………二五

胡蘊……………二五

胡恩綬……………二五

胡天人……………二五

胡復全……………二六

胡世楨……………二六

胡介昌……………二六

胡善仕……………二七

胡祥清……………二七

胡墨儒……………二七

韋永和……………二七

夏鷗……………二七

奚紹爽……………二八

孫同德……………二八

孫誥鴻……………二八

孫家瑞……………二八

孫玉……………二九

徐緒通……………二九

徐其鴻……………二九

徐公修……………二九

徐松……………三〇

徐霈……………三〇

徐超……………三〇

徐應鵬……………三〇

秦景清……………三一

秦錫田……………三一

秦之濟……………三一

翁守藩……………三一

荆鳳崗	三二
袁增	三二
袁昌和	三三
郝鑫海	三三
高伯瑜	三三
康以毅	三三
虞萬選	三四
張逢辰	三四
張官倬	三五
張揚芬	三五
張學義	三六
張社	三六
張錫芳	三六
張念祖	三六
張緩圖	三七
張文魁	三七
張久士	三八

紅拂集

目錄

張鍾亮	三八
張寶樹	三八
張臻	三八
張江裁	三八
張錫慶	三九
張翼壘	三九
曹桐	三九
曹紹南	三九
曹嘉詔	四〇
曹賢	四〇
凌春生	四〇

卷三

【紅拂圖詠下】

郭福如	二
郭進	二
陳洙	二
陳淵	三
陳守治	三
陳祖方	三
陳其謙	三
陳敏	四
陳俗	四
陳奎	四
陳蔚華	四
陳永釗	四
陳祖衡	五
陳建熙	五
陸颺	五
陶鏞	五
傅維中	五

紅拂集目錄

傅謙豫	六	管之樞	一四
富銘鐘彭	六	翟法乾	一五
會笑雲	六	趙潤	一五
湯允莘	七	劉熙照	一五
湯忠鑫	七	劉宏	一六
甯勤德	七	劉仲澤	一六
費志中	七	劉穀蓀	一六
鈕敦仁	七	劉家芹	一七
童煦人	八	潘文安	一七
閔可仁	八	練雲樵	一七
華重協	八	蔡守談溶溶	一七
華精	八	蔡亮成	一七
馮蘅蓀	九	蔡振南蔡杏芳	一八
黃作楷	九	蔣兆燮	一八
黃文琛	九	蔣學潛	一九
黃敬	九	鄭霽光	一九
楊雪門	九	鄭莖廣	一九
楊星垣	一〇			
楊健高	一〇			
楊蔭廷	一〇			
楊鍾衡	一〇			
楊南春	一一			
楊國琛	一一			
楊肇瀛	一一			
楊鍾寰	一二			
楊天和	一二			
楊名賢	一三			
楊鴻年	一三			
業揆	一三			
葉子宜	一三			
葉壽祺	一三			
葉際唐	一四			
鄒理之	一四			
靳淑潛	一四			

鄭永詒	一九
鄭翼堂	二〇
錢學坤	二〇
錢嘉穀	二〇
錢霖	二〇
錢鍾瑜	二一
錢裕麟	二一
鮑祖德	二一
鮑灃穆	二一
龍賡言	二一
魯晉藩	二二
盧璧	二二
諸懿德	二二
韓應辰	二三
羅煥藻	二三
關和甫	二三
嚴昌培	二三

紅拂集

目錄

嚴惟式	二三
嚴潛	二四
蘇育南	二四
顧濂	二四
顧德鈺	二五
顧玉麒	二五
秋厂	二五
詞	
方壽昌	二五
王治	二六
王鼎銘	二六
王育磨	二六
朱家驊	二六
吳聽猿	二七
吳承烜	二七
吳清麗	二八
宋攀桂	二八

李嘉禾	二八
周龍章	二八
俞尙志	二九
姚洪淦	二九
孫同德	二九
徐守清	三〇
袁潛	三〇
張榮培	三〇
張揚芬	三〇
陸寶樹	三一
湯英	三一
項實	三一
楊遵路	三一
楊肇瀛	三一
鄒錫祐	三一
熊發元	三一
劉思鞠	三一

劉心如	三三
劉敬	三三
潘逸園	三三
蔡璧	三四
閻震中	三四
諸懿德	三五
韓道明	三五
曠世斌	三六
龐仕	三六
顧浚	三六
閻秀	
王韞秀	三六
朱芳渠	三七
周儀英	三七
金令儀	三七
姚瀟	三七
孫妙真	三七

張寶媛	三八
麥寶英	三八
錢美楮	三八
龐秀娟	三八

卷四

紅拂詩話	朱惟公	一
太忙啓事		二〇
紅拂續話	太忙補撰	二一

李靖
紅拂



徐道士
虬驎公



隋煬帝
楊素



李世民
劉文靜



紅拂集卷一

南匯朱惟公纂輯

紅拂偶錄

唐代叢書

清山陰陳蓮塘

虯髯客傳

唐洛陽張說道濟

隋煬帝之幸江都。命司空楊素守西京。素驕貴。又以時亂。天下之權重望崇者。莫我若也。奢貴自奉。禮異人臣。每公卿入言。賓客上謁。未嘗不踞牀而見。令美人捧出。侍婢羅列。頗僭於上。末年愈甚。無復知所負荷。有扶危持顛之心。一日衛公李靖。以布衣上謁。獻奇策。素亦踞見。公前揖曰。天下方亂。英雄競起。公爲帝室重臣。須以收羅豪傑爲心。不宜踞見賓客。素斂容而起謝。公與語。大悅。收其策而退。當公之騁辨也。一妓有殊色。執紅拂立於前。獨目公。公旣去。而執拂者臨軒指吏曰。問去者處士第幾。住何處。公具以對。妓誦而去。公歸逆旅。其夜五更初。忽聞叩門而聲低者。公起問焉。乃紫衣帶帽人。杖一囊。公問誰。曰。妾楊家之紅拂妓也。公遽延入。脫衣去帽。乃十八九佳麗人也。素面畫衣而拜。公驚答拜曰。妾侍楊司空久。閱天下之人多矣。無如公者。絲蘿非獨生。願托喬木。故來奔耳。公曰。楊司空權重京師。如何。曰。彼屍居餘氣。

不足畏也。諸妓知其無成。去者甚衆矣。彼亦不甚逐也。計之詳矣。幸無疑焉。問其姓。曰。張。問其伯仲之次。曰。最長。觀其肌膚儀狀。言辭氣語。眞天人也。公不自意獲之。愈喜愈懼。瞬息萬慮不安。而窺戶者無停履。數日亦聞追討之聲。意亦非峻。乃雄服乘馬。排闥而去。將歸太原。行次靈石旅舍。旣設牀。爐中煮肉且熟。張氏以髮長委地。立梳牀前。公方刷馬。忽有一人中形。赤髯如虬。乘蹇驢而來。投革囊於爐前。取枕。敬臥。看張梳頭。公怒甚未決。猶親刷馬。張熟視其面。一手映身。搖示公。令勿怒。急急梳頭畢。斂衽前問其姓。臥客答曰。姓張。對曰。妾亦姓張。合是妹。遽拜之。問第幾。曰。第三。因問妹第幾。曰。最長。遂喜曰。今夕幸逢一妹。張氏遙呼李郎。郎且來見三兄。公驟拜之。遂環坐。曰。賁者何肉。曰。羊肉。計已熟矣。客曰。饑。公出市胡餅。客抽腰間七首。切肉共食。食竟餘肉。亂切送驢。前食之甚速。客曰。觀李郎之行。貧士也。何以致斯異人。曰。靖雖貧。亦有心者焉。他人見問故不言。兄之問則不隱耳。具言其由。曰。然則將何之。曰。將避地太原。曰。然。故非君所致也。曰。有酒乎。曰。主人西則酒肆也。公取酒一斗。酒旣巡。客曰。吾有少下酒物。李郎能同之乎。曰。不敢。於是開革囊。取一人頭并心肝。却頭囊中。以七首切心肝共食之。曰。此人天下負心者。銜之十年。今始獲之。吾憾釋矣。又曰。觀李郎儀形器宇。眞丈夫也。亦聞太原有異人乎。曰。嘗識一人。愚謂之眞人也。其餘將帥而已。曰。何姓。曰。靖之同姓。曰。年幾。曰。僅二十。曰。今何爲。曰。州將之子。曰。似矣。亦須見之。李郎能致

吾一見乎。曰：靖之友劉文靜者，與之狎。因文靜見之可也。然兄何爲？曰：望氣者言太原有奇氣，使吾訪之。李郎何日到太原？靖計之曰：達之明日，日方曙，候我於汾陽橋。言訖，乘驢而去。其行若飛，迴顧已失。公與張氏且驚且喜。久之曰：烈士不欺人，固無畏，促鞭而行。及期入太原，果復相見大喜。偕詣劉氏，詐謂文靜曰：有善相者，思見李郎君，請迎之。文靜素奇其人，一日聞有客善相，遽遣使迎之。使迴而至，不衫不履，褻裘而來，神氣揚揚，貌與常異。虬髯默然居末坐，見之心死，飲數杯，招靖曰：真天子也。公以告劉，劉益喜自負。既出，虬髯曰：吾得八九矣。然須道兄見之。李郎宜與一妹復入京。某日午時，訪我於馬行東酒樓下。有此驢及瘦驢，卽我與道兄俱在其上矣。到卽登焉。又別而去。公與張氏復應之。及期訪焉，宛見二乘，攬衣登樓。虬髯與一道士方對飲，見公驚喜，召坐，圍飲十數巡。曰：樓下櫃中有錢十萬，擇一深穩處駐一妹。某日復會於汾陽橋。如期至，卽道士與虬髯已先到矣。俱謁文靜，時方弈棋，起揖而語。少焉，文靜飛書迎文皇看碁。道士對文靜弈，虬髯與公旁侍焉。俄而文皇到來，精采驚人，長揖就坐，神氣清朗，滿坐風生。顧盼煒如也。道士一見，慘然斂棋子曰：此局全輸矣。於此失却局哉。救無路矣。罷弈請去。既出，謂虬髯曰：此世界非公世界，他方可也。勉之，勿以爲念。因共入京。虬髯路語公曰：計李郎之程，某日方到。到之明日，可與一妹同詣某坊曲小宅相訪。李郎相從一妹，懸然如磬，欲令新婦祇謁從容，無令前却。言畢，吁嗟而去。

公策馬而歸。卽到京。遂與張氏同往。至一小版門叩之。有應者出拜曰。三郎令候李郎一娘子久矣。延入重門。門愈壯麗。婢四十人。羅列庭前。奴二十人。引公入東廳。廳之陳設。窮極珍異。巾箱妝奩。冠鏡首飾之盛。非人間之物。巾櫛妝飾畢備。請更衣。衣又珍異。旣畢。傳云。三郎來。乃虬髯也。紗帽褐裘而來。亦有龍虎之狀。歡然相見。命其妻出拜。蓋亦天人也。四人對饌訖。陳女樂列奏其前。飲食妓樂。若從天降。非人間之曲。食畢行酒。家人自堂東舁出二十牀。以錦繡帕覆之。旣陳。盡去其帕。乃文簿鑰匙耳。虬髯曰。此盡寶貨泉貝之數。吾之所有。悉以充贈。何者。某本欲於此世界求事。或當龍戰二三載。建少功業。今旣有主。住亦何爲。太原李氏。眞英主也。三五年內。卽當太平。李郎以奇特之才。輔清平之主。竭心盡力。必極人臣。一妹以天人之姿。蘊不世之藝。從夫之貴。榮極軒裳。非一妹不能識李郎。非李郎不能遇一妹。聖賢起陸之漸。際會如期。虎嘯風生。龍吟雲萃。固非偶然也。持予之贈。以佐眞主。贊功業也。勉之哉。此後十年。當東南數千里外有異事。是吾得志之秋也。一妹與李郎。可瀝酒東南相賀。因命家僮列拜曰。李郎一妹。是汝主也。言訖。與其妻。從一奴。乘馬而去。數步遂不復見。公據其宅。乃爲豪家。得以助文皇帝締構之賞。遂匡大業。貞觀十年。公以左僕射平章事。適南蠻入奏曰。有海船千艘。甲兵十萬。入扶餘國。殺其主自立。國已定矣。公心知虬髯成功也。歸告張氏。具衣相賀。瀝酒東南祝拜之。乃知眞人之興也。非英雄所冀。况非英雄者。

乎。人臣之謬思亂者。乃螳臂之拒走輪耳。我皇家垂福萬葉。豈虛然哉。或曰。衛公之兵法。半乃虬髯所傳也。

池北偶談

清新城王士禛貼上

黃鬚

宋范公稱過庭錄載黃鬚傳。即今所傳虬髯事也。然其間云於汴州見太宗。殊紕謬。黃鬚兒曹操呼其子彰。而此傳李衛公所遇。亦稱黃鬚。

茶香室叢鈔

清德清俞樾蔭甫

黃鬚翁

宋范公稱過庭錄云。舊家多藏異書。兵火之後。無復片紙。尙記有一黃鬚傳云。李靖微時甚窮。寓於北郡一富家。一日靖竊其家女而遁。行至暮。投一旅舍。飯罷濯足於門。見一黃鬚老翁坐于側。且熟視神色非常。靖恐富家捕已者。欲避之。頃於皮篋中取一人頭。切食甚闌暇。靖異之。乃就問焉。翁曰。今天下大亂。汝當平天下。然有一人在汝上。若其人亡。則汝當爲王。汝可從我求之。靖隨翁數程至汴州。見一大第中數人弈。翁同站立云。不見某人矣。頃見一人披衣從中出視弈者。蓋太宗也。翁驚曰。即此人當之。汝善佐其

事。遂別。語靖曰。此去四十五年。東夷中有一黃鬚翁。殺其君而自立者。卽我也。靖旣佐唐平亂。貞觀中東夷果奏一黃鬚翁殺其君而自立。案此卽唐人所傳虬髯公事。而情節小異。今世人皆知有虬髯公。莫知有黃鬚翁矣。

讀書敏求記

清常熟錢 曾避王

虬髯客傳

虬髯客傳一卷。楊彥淵筆錄云。口上曰髭。頤下曰鬚。在耳頰旁曰髯。上連髮曰鬢。髯之不混鬚也明矣。漢朱博傳。奮髯抵几。蜀志。猶未及髯之絕倫逸羣。黃香青髯奴辭。離離若綠坡之竹。鬱鬱若春田之苗。古人描寫髯之修美。並未言其虬也。老杜八哀詩。虬鬚似太宗。西陽雜俎。太宗虬鬚。常戲張挂弓矢。南部新書。太宗文皇帝虬鬚。上可挂一弓。蓋虬鬚字之有本若此。今人安得妄改爲虬髯客乎。其謬始於紅拂傳奇。流俗承譌已久。故書此正之。

柳南隨筆

清常熟王應奎京嶽

紅拂記

張說有虬髯客傳。鬚字今本誤刻爲髯。按楊彥淵筆錄云。口上曰髭。頤下曰鬚。上連髮曰鬢。在耳頰旁曰

髯之不得混鬚也明矣。三國志崔琰傳。注云琰爲徒虬鬚直視。心似不平。此虬鬚二字之始。又老杜八哀詩。虬鬚似太宗。酉陽雜俎。太宗虬鬚。常戲張掛弓矢。南部新書。太宗文皇帝虬鬚。上可掛一弓。蓋虬鬚二字之有本如此。若虬髯則吾於書史中。未之見也。安得妄爲改易乎。考其繆始於紅拂傳奇。流俗之承譌。蓋其來久矣。

小浮梅閒說

清德清俞 樾蔭甫

紅拂記

張伯起紅拂記。本於唐人小說。然不足據。虬髯本傳稱貞觀中靖位至僕射。東南蠻奏曰。有海賊以千艘。積甲十萬人。入扶餘國。殺其主自立。國內已定。考新舊唐書。並無扶餘國。惟高麗百濟。並云扶餘之別種也。高麗國中有扶餘城。武德七年。高麗王建武懼伐其國。乃築長城。東北自扶餘城。西南至海。千有餘里。是高麗方據扶餘城以自固。豈他人得襲而有之也。又考薛仁貴傳云。乾封初。高麗大將泉南生內附。遣將軍龐同善高等迎接之。男生弟男建。帥國人逆擊。仁貴領驍勇赴救。乘勝進攻扶餘城。遂拔扶餘城。扶餘川四十餘城。乘風震懼。一時送款。使誠有虬髯事。亦不久殘破矣。

花朝生筆記

撰人未詳

紅拂集 卷一 紅拂偶錄

八

紅拂記

明張伯起紅拂記傳奇。蓋衍此事。案此傳與唐史不合。史稱大業十四年。文皇年十八起義兵。而煬帝以元年幸江都。是時文皇甫六齡。安得謂僅二十而有天子相乎。若以此幸爲十二年事。則楊素之亡已久。且衛公嘗上高祖急變。豈能識太宗塵埃中邪。其爲子虛烏有之說。無可疑者。傳奇之舛繆。又不待論矣。

高青邱集

明長洲高 啓季迪

題紅拂妓詩

花枝不鎖後堂春。夜半長安旅邸貧。棄去老奴從此客。可憐小妓亦知人。

六如居士全集

明吳縣唐 寅伯虎

題自畫紅拂妓卷

楊家紅拂識英雄。著帽宵奔李衛公。莫道英雄今沒有。誰人看在眼睛中。

明末四百家遺民詩

清漢軍卓爾堪子任

馬鳴鑿伯和貴州貴陽人。

紅拂

身經兩傑不尋常。尙覺楊公遜李郎。一見便能知國士。笑人索駿只驪黃。

梅村集

明太倉吳偉業駿公

奔拂

歌舞侯門一見難。侍兒何得脫長安。樂昌破鏡翻新唱。喚取楊公作舊官。

百美新詠

清錢塘袁枚子才

紅妝倚立捲輕羅。具眼英雄智若何。籠絡虬髯偏有術。相公才少妾才多。

清會稽羅青植橙橙

令公勢燄等屍居。具眼英雄入謁初。倘使秦王更相遇。不知心折定何如。

清仁和周麟晴巖

逆旅蕭條客閉門。紫衣人至趁黃昏。如花不假眉梢語。雄服青驄下太原。

烟霞萬古樓詩集

清秀水王曇仲瞿

龍虎吟爲羅二十五題越史三俠圖

旗之黃兮蓋之紫。龍山王氣占天子。蠡牙白雀走踈踈。天下人人唱桃李。龍舸鳳艚江都宮。西京守者楊

司空霹靂弓聲威戴頭。踞牀漫罵卿與公。秦箏趙瑟行行立。南臉西眉暗鳴喏。蝶舞蜂飛十八鬢。李郎辯
騁高陽楫。觸體臺下心。語花笑蘭言。軸簾女臨軒。執拂問何人。處士何行住何處。鳳城樓轉明星露。雞
犬三條啼鳴吠。紫衣著帽仗囊來。妾是楊家畫衣妓。張星不是人間有。十九佳人膽如斗。萬人叢裏少如
公。吾待司空閱人久。羈君山令帶君河。上有松柏下絲蘿。容顏不惜屍居死。騎鳳吹簫去已多。關山月夜
陳籌箸。芟舍晨炊太原去。雄鳴雌宿下荒原。靈石風霜稅行路。雲中公子赤髯鬚。寶刀跨下六腰驢。囊中
飲器仇人血。怒氣難平檻下駒。靈蛇髻子房中出。佩響環鳴罷梳櫛。平生姓氏少人知。兄妹何妨締秦越。
黃羊胛熟客調饑。葡萄覓酒主人西。就中密識英雄士。坐裏英雄翼已齊。龍吟虎嘯雲風速。天下勞勞逐
秦鹿。秦王破陣掃隋氛。東海魚王走平陸。越中畫史史中英。圖成三俠頰豪生。何人不讀虬髯傳。一似兒
童識姓名。吁嗟乎。芒碭山中劍如水。赤蛇帝斬白蛇子。兩賢不厄竟何如。田橫五百同時死。

金鐘山題李王廟并書夫人寢碑

安吉爲唐故鄞地。公平輔公祐於此。故碑有平盜丹陽之語。今名李王山中。碑版林立。皆唐宋人
書。案公爲韓擒虎外甥。初見楊素。卽有拊牀推坐之目。公爲庸人。亦當感恩知己。况英雄乎。是必無
私其侍姬。爲申公巫臣之爲者。小說欲以英雄推夫人。故重誣衛公矣。詩以辨之。

金天華嶽一書通。首上江陵十策功。青海驕汗巢穴盡。陰山無主幕庭空。韓擒宅相難爲舅。楊素胡牀推與公。能得青年有知己。良弓高鳥自英雄。我讀虬髯傳不然。夫人墳冢象祁連。衛公謹畏如平日。越國房韓况晚年。侍史忍辭袁盎去。舍人肯負孟嘗賢。唐書兩種難憑信。况且虞初九百篇。

古豔樂府

清吳江楊 淮黃園

長安古今一棋局。朝韓夜趙多碌碌。熏天富貴倚冰山。龍蛇不辨羣無目。屍居氣揚司空。出羣雄。李衛公。中原鹿。共馳逐。此也雄飛。彼也雌伏。海上臺。定局猶待東南角。王者師。執拂凝眸早已卜。(青目鑑)

吳淞草堂詩稿

清上海王 折子乘

題鄭堂所藏紅拂圖

雙瞳翦水寒于星。美人眼爲英雄青。衛公昔日未得志。浪遊偶出懷中刺。金貂貴人易視之。執拂侍兒獨心醉。譬如鷲鳥辭樊籠。易衣夜出重關通。鐙前相視一相笑。天下未有人如公。誰拋心力寫生面。俠氣癡情兩如見。手持紅拂不動塵。女兒之中有此人。

瓶水齋詩集

清大興舒 位立人

五雜俎

紅 拂 集 卷一 紅拂偶錄

五雜俎。妓紅拂。往復還。虬髯客。不得已。扶餘國。

寒松閣詩集

清嘉興張鳴珂公京

風塵三俠圖爲家右企廣恩題

風塵傾洞蓬萊淺。菰蘆下士侯門踐。美人慧眼識英豪。逆旅好結同心伴。闐然何處來虬髯。手牽神駿窺香簫。風雲離合萍蹤聚。王霸餘略傾心談。韻事流傳稱三俠。屈指千年纔一眨。清河公子選芳姿。氤氳初授鴛鴦牒。蛾眉生小愛秋花。金鳳開時認妾家。違惜明珠量十斛。移來春色碧城霞。尺素無端貌陳迹。蘭若翡翠銀河夕。睨而視者彼何人。我亦鬚髯奮如戟。

炊萸子松風集

清華亭耿道冲齊賢

詠扶餘國王張仲堅

長髯拂拂氣蓬蓬。偏遇文皇拜下風。外海豈無新土宇。中原已有主人翁。頭顱羞取隋煬帝。羽翼添貽李衛公。億萬貲財交一妹。多情有禮是英雄。

詠扶餘國王之道友徐洪客

暫藏丹鼎問兜鍪。出爲扶餘王運籌。君且退休作龍伏。我圖進步展鴻猷。東南一角迎機占。壺嶠羣仙約。

伴游。還服黃冠。藐金紫。何如辟穀漢留侯。

書舶庸譚

紹興董 康後金

紅拂

楊李枯榮。顧盼間。從。致。豔。俠。播。塵。寰。夫。工。籌。筆。妻。工。鑑。合。上。凌。煙。繪。玉。顏。

長真閣詩集

清洞庭席佩蘭道華

題張夢廬太守二紅摘豔冊

謁素

清臚翦水玉顏紅。執拂金堂侍上公。比似臨邛高一著。文人不看看英雄。

叩旅

露白霜淩燭影紅。紫衣脫却見驚鴻。張星偷下人間世。欲笑司空在夢中。

逸晉

柔情俠骨此傾城。肯學當爐伴長卿。識得太原龍氣在。雙雙疊騎出西京。

遇髯

紅拂集 卷一 紅拂偶錄

策蹇西來逆旅蹤。公然高臥看芙蓉。李郎一笑逢雙絕。天上蛾眉海外龍。

望氣

不衫不履褐裘來。真氣驚人色死灰。草澤龍蛇天判定。洛陽橋上莫徘徊。

會局

推起楸枰罷賭棋。虬髯無語道人知。笑他鄭夏空爭戰。一局全輸斂子遲。

贈業

甯作雌龍莫作蛇。匆匆兄妹各天涯。黃金揮手真如籀。笑指東南別有家。

自然好學齋詩鈔

清錢塘汪 端九莊

紅拂圖

如月橫波玉立身。解知國士在風塵。蛾眉卓識同千古。祇有投金灑畔人。

名姝百詠

清三十六峯女史李淑儀

題紅拂

重門列戟畫堂開。溷跡風塵識俊才。若使專房承寵愛。肯行深夜換妝來。

慧福樓幸草

紅拂

清德清俞繡孫 錄裳

十五盈盈掌上身。多情巨眼識風塵。楊公應悔聽奇計。未得成功失美人。

五百石洞天揮塵

海澄邱煒 荻園

紅拂摘句嘉應宋湘芷灣

竟能識吾浮沈日。如此關懷將相人。

二黃尋聲譜

程豔秋

在相府每日裏承歡侍宴。也不過與衆女鬥寵爭妍。雖然是舞衫中常承恩眷。辜負了紅拂女錦繡華年。對春光不由芳心撩亂。想起了紅顏老更有誰憐。

美人譜

清秀水徐 震秋濤

古來名妓有足當美人之目者。共得六人。紅拂李娃薛濤紫雲蘇小小琴操。

閒情十二懶

清莆田蘇士琨 聖孚

撫奇云。奇趣如紅拂柳姬。奇骨如紅線輩。皆是奔天震地。鬥月驚雷。世界未落。雙眼長青。日以女流不可。

就目以勇流亦不可。直是牀頭捉刀。奇流無二。嗚呼。盡令此間逐塵漢吐舌死矣。

隋唐嘉話

唐彭城劉 鍊鼎卿

李百藥

李德林爲內史令。與楊素共執隋政。素功臣豪侈。後房婦女。錦衣玉食千人。德林子百藥夜入其室。則其寵妾所召也。素俱執於庭。將斬之。百藥年未二十。儀神雋秀。素意惜之。曰。聞汝善爲文。可作詩自敘。稱吾意。當免汝死。解縛授紙筆立就。素覽之。欣然以妾與之。并資從數十萬。

麗情集

明新都楊 慎用修

虬髯老叟

唐呂用之在淮揚日。佐高駢專權擅政。有商人劉損妻裴氏。有國色。用之以陰事搆取。損憤惋。因成詩三首寄之。詩成吟詠不輟。一日晚。見一虬髯老叟。行步迅疾。眸光射人。揖損曰。子衷心有何不平之事。損具對之。叟果夜入用之家。化形於斗棋之上。叱用之曰。所取劉氏之妻。并其寶貨。速還之。否則隨刀落矣。用之驚懼。夜遣幹事。費金并裴氏還損。損夜促舟去。虬髯亦無蹤跡。太忙案此卽因紅拂事而附會。不然。何唐代虬髯之多也。

戲瑕

明錢希言甄曹

黃鬚傳

李藥師遇虬髯客事甚奇。張說立傳。文亦變幻。及閱宋人高平范公稱過庭錄。則又有黃鬚傳一篇。但言竊富家女。不言楊家紅拂妓。而虬髯捐貲佐李一段。亦不之及。文無波瀾。不似出唐人手。

楊了公先生詩集

松江楊錫章了公

紅拂

慧眼英雄證夙因。快如秋隼出風塵。侯門如海深難見。祇是尋常執拂人。

徵題紅拂圖

點絳脣 自題紅拂圖有序

此楊令公家執拂妓也。嘉其有慧眼能識英雄。因追想其夜奔之情。與景而約略寫之。并贊一詞以紀其美。亦我輩文人之雅興也。

一入侯門世人閱。盡英雄。少落花啼鳥。只怕人空老。忽遇英豪蓮幕抽身早。相逢了。夜深人窅。細語鶯聲悄。

紅拂集卷一 徵題紅拂

一八

品花仙史鍾斯感題於吟風仙館

鍾孝廉斯感字際唐吾邑南匯人擅詩詞工畫山水人物識者寶之著有漱石居稿昔龔定盒得趙飛燕玉印喜賦云自誇奇福至端不換公卿又云狂臚詩萬首高供閣三層是圖適爲予獲亦殊有龔子狂臚萬首之意爰錄其詞并附拙句二十絕於後伏仰

海內吟壇不吝珠璣而辱教之曷勝榮幸

庚申九月南匯朱惟公太忙甫識

己未五月二日購獲召樓鍾際唐先生所繪紅拂圖口占一絕誌喜

俠腸英盼盡神機肝胆分明古亦稀寄語今宵拌不寐平衢攜手素心歸

庚申六月初五日因曬曝重展一過溯去歲皆以單狹片幅疑爲殘缺不備率弗顧而予一見市歸殆亦有夙緣與再拈二截用誌喜感

昔年慧眼識英雄今日塵中孰識紅應作兩般知己看侯門冷肆賞心同
紫衣紗帽快追隨豔福平分李藥師喜煞狂生狂太甚藏嬌一載兩題詩

續題

司徒百戰遠戎韜儒將風流蓋代豪誰信箇人防跋扈翻身大笑樂東臯尋常義俠般般見佐到邦家
始可人梁識斬王張識衛千秋紅粉兩功臣屍居餘氣劇譏嘲回首西京舊恨銷卻笑紫雲逢杜牧司
勳猶自綺筵邀龍髯一柄衆中藏破鏡偏偏嬖樂昌若使風情同石尉綠珠紅拂姓齊芳英雄老去
事修真恍是長齋棄置身我讀唐書登善傳爲卿呼屈罵庸人芳名幸藉說公恢妙質兼邀鍾子猜我
亦當今一朱亥願排髯俠結兄來糊塗醉吏司空醒踞見英雄自覺寒執拂閉同持楫比孝心儘有熱
腸難誰將七字碧紗籠我本無才躡詞雄祇願塵埃時拂拭仲先詩句勝萊公

再題

乘冰殺敵王君鑿賜帛登樓夏武威舊曉夫人原屬魏不應籠罩譽爭歸楊裘風度貌超常心死虬髯
默不張此日相看懷抱盡何如席地睇梳妝重門壯麗萬珍儲新婦攜參祇謁徐更有真人天際想一
妻一馬入扶餘昇出堂東二十牀留充龍戰逐翱翔因人究亦成何事海外誰知別有鄉太原龍骨
虬髯俠底用人間豔李張一妹深藏良有意恐和歟女識襄王羽士居然眼亦神文皇精采更驚人饒
他一局劉郎劫不費推敲便已贏從來尤物禍人多不道同心解枕戈匡得勳名誰似妾紅蓮五戒墮
妖魔琵琶絃急落紅悲胆怯將軍苦懼追自是效顰憎肉眼莫教錯逐挺之兒閒情錯賦撇家邦功

紅拂集卷一 徵題紅拂

二〇

狗侯門事事降慚煞王郎偏好色天涯辛苦却無雙

澧溪讀書太忙生甫稿

昔庚申歲徵題此圖應者祇百餘家詩不滿千首選錄之餘尙不克成集爰於今歲重印數百份繼續徵求雖萬首之願難償而瓊瑤之投予盼甚殷焉他日擇尤刊佈時定當各贈一集用酬雅誼

甲子孟夏朱益明謹啓（庚午仲冬又重印）

紅拂圖題詠集序

名士坎坷。英雄落拓。往往欲尋一風塵知己。而卒不能得。此古今同慨也。鍾孝廉斯感。清季之名士也。深感於知己難逢。洒吮毫拂紙。繪紅拂圖。以紅拂爲知己焉。意鍾子繪圖時。當慨然言曰。我知己紅拂矣。不知後世愛我畫而知己者。果何人也。詎知數十年來。此圖流離展轉。而入於朱子太忙之手。愛逾拱璧。重若連城。是鍾子慮後世之無知己。竟得一知己朱子矣。然鍾子之知己紅拂。紅拂不知也。朱子之知己鍾子。鍾子亦不得而知也。是以古人爲知己。不若並世有知己爲快。所以朱子捧斯圖而大徵題詠也。吟筒往還。一堂千里。得詩萬首。蔚爲大觀。其快樂庸有涯耶。雖然。滔滔濁世。知我其誰。與其得一不關痛癢之知己。轉不若知己古人爲愈矣。是紅拂之知己李衛公。遂成姻緣佳話。鍾子知己紅拂。因此圖而留爲美談。朱子知己鍾子。亦將以題詞一集。並傳不朽矣。但不知後世讀是集。而能知己朱子者。又何人也。後之視今。亦猶今之視昔。噫。感慨係之矣。謹序。高郵恕思韓道明拜譔。

紅拂集題詞

讀書忙未了。拋卷又操觚。名句搜珠玉。芳容揖畫圖。俠情傳美女。冷眼笑凡夫。堪羨鵝湖後。千秋合與俱。

丹徒賈 銓瑞甫

詞林妙選富搜求。黛影釵痕豔蹟留。佳話合傳名士筆。奇才慧眼各千秋。

平湖袁 潛瀾梅

鎮日讀書號太忙。圓圈吟罷又紅妝。別裁名句同慧眼。前刊圓圈詩集及是集卷末均附有詩話。欣賞共登大雅堂。

一樣鍾情事不同。豔稱名妓屬三紅。兼唐紅綃宋紅玉而言。宵奔別有憐才處。我獨於卿拜下風。

南匯姚永年 養怡

炎涼世態盡趨時。巨眼何人識古姬。今亦風塵有知己。潁川妙筆紫陽詩。十八年來輯錄忙。豪情未減老逾狂。珊瑚一網珠光吐。披卷閒吟滿袖香。

南匯朱惟公 太忙

吮墨飛箋二百家。廿年什襲蔚雲霞。不逢知己逢嬌女。紙上姻緣亦孔嘉。塵海休嗟賞識難。淫書病蠹漸成乾。丹青不改千年色。倚劍宵深兀自看。

紅拂集卷二

南匯朱惟公編次

紅拂圖詠上

江都丁柏坪伯屏

英雄自古識英雄。夤夜私奔逆旅中。說破行藏同一笑。楊公真是可憐蟲。
虎氣熊姿結契深。是兒偏有好胸襟。天生雄警過人處。不在知機在賞音。

三河丁兆松左卿

世人閱盡傍侯門。一見王孫便斷魂。寫入丹青人宛在。莫教誤認是淫奔。

南匯于 干今我

裙邊袖角競題詩。寫出當年不世姿。今日披圖深睇睇。憐君有幸笑儂癡。
年年冷住戟門中。纖手輕携一拂紅。幸把靈犀通末座。早瞪慧眼識英雄。
粧換花鈿行悄悄。宵來旅邸步珊珊。阿儂羞作侯門伎。御李而今志願完。
求凰曲肯等閒彈。世上知心彼此難。寄語千秋淪落客。休將泥絮一齊看。

上海孔祥百志怡

一片朱家舊俠腸。風塵猶是夢隋唐。南沙竟獲傳神筆。欲效虬髯看曉妝。

興化孔慶徵應度

十步之內有芳草。荆玉誰辨爲至寶。世人肉眼盡昏昏。何怪英雄嗟潦倒。我聞隋妓張出塵。雖列姬羣迴絕倫。一日侯門報客至。獨識布衣非常人。絲蘿願將喬木託。才子佳人欣合作。天涯不乏千里駒。安得相馬如伯樂。

寶應毛文沂瀚波

漱石居中作畫圖。(鍾孝廉著有漱石居詩詞稿)英雄慧眼美人軀。當今誰似虬髯俠。合讓朱家一妹呼。等是裙釵窈窕身。得君賞識洗緇塵。嬌容若便藏金屋。拂拂英風可怖人。

歙縣方 德醉民

天荒地老英雄嘅。酒沸花騰粉黛歌。忽見懷材傾北海。默思留枕薦東阿。他年血汗披榛莽。此日情絲動綺羅。鑒辨風塵能擇主。千秋慧眼閱人多。

六安王濤澄子淵

賦詩十絕善牢籠。十萬貔貅筆逞雄。不願封侯惟好色。愛卿欲覓問天公。
圖形凌閣重安邦。儒將風流筆下降。無怪太忙忙太甚。珍藏奇寶信無雙。
點頰添毫薄粉敷。花容俠氣不模糊。有心人自留心賞。幾度牽情此畫圖。

鹽城王寅斗少雲

南匯王麟書佐才

莫謂奴身作妓身。肯將肉眼混風塵。叩閣深夜絲蘿託。識得人間第一人。
唐代勳臣一見知。此身敢誤夙心期。最難眼力高千古。能識英雄未達時。
曾記紅綃出畫樓。崑崙奴費暗中偷。如何執拂楊家妓。歸李偏能得自由。
石家難保綠珠全。濁富原來值甚錢。試看奔紅相李靖。功成猶得畫凌烟。
黃夜嚴妝到李家。奇男子卽美人花。私奔不是桑中約。贏得英名萬古誇。

瓊州王啓懷

閱盡英雄久侍楊。衛公才氣世無當。臨軒指吏頻頻問。莫謂儂家是病狂。

平遙王奇馨仁甫

紅拂集 卷二 紅拂圖詠上

四

風流妙筆盡神機。結綠青萍識者稀。冷肆幸而逢薛下。傾城絕代伴君歸。絲蘿締結識英雄。慧眼應推執拂紅。一幅畫圖情景在。兩般知己古今同。

名士藏嬌喜氣隨。吟成珠玉萬人師。愧無李杜琳琅句。附驥空思寫艷詩。（和太忙先生原韻）

風流更艷麗。器識秉天公。慧眼超塵遠。俠腸絕世雄。夜深風淡淡。人靜月融融。情景今猶在。畫圖想像中。敲門月下候。態度自風流。玉樹成連理。僊葩開並頭。神情誇萬古。肝胆照千秋。妙妙孝廉筆。飛鴻雪爪留。

南匯王家彥士文

英雄淘汰盡。青眼幾人垂。未諳焦桐操。如牽繡幙絲。紫衣疑燕領。紅袖識蛾眉。山左相携手。仙緣屬藥師。孝廉船已渺。粉本尙遺瓠。絕世儕紅玉。招魂賦綠珠。叩門會感遇。凌閣並傳圖。博得詩題畫。江東紙貴無。

合肥王逸雪亭

秋波湛湛翦雙瞳。笑壓春風想像中。應是生來有俠骨。女兒幾個識英雄。知音艷說卓文君。杜牧曾聞乞紫雲。若論俠腸兼慧眼。只應紅線與同羣。

六合王乃屏展爲

淺黛低鬟絕世姿。中藏俠氣少人知。女兒不是凡脂粉。請看侯門侍側時。

宵奔豈是爲情癡。身世飄零自主持。一遇英雄肝膽吐。妙齡女子足稱奇。

南雁王雪禪 金吾拳

越公暮氣漫相嘲。解放先聲自足豪。狡鳳囚鸞如察察。肯容五夜美人逃。

蕭山王仁溥 袖滄

漂母飯韓信。傳妻饋晉公。古來奇女子。多半識英雄。（蒨園詩稿不載）

北平王恆清 靖蘇

悔向楊家作侍兒。英豪驟遇惹情癡。座中獨解憐才意。（楊基詩座中紅拂解憐才）一見心傾李藥師。

常熟王巖懷 谷

天生慧眼識英雄。揮麈侯門藐令公。千古無雙真女俠。而今巾幗有誰同。

合肥史遠峴 慕山

心有靈機眼有神。侯門暫屈自由身。李公畢竟真豪傑。賞識居然到美人。
楊氏家兒是講才。空誇軍勢捲風雷。量珠十斛成奚用。俠女原羞入彀來。
去就分明辨重輕。熱心一片爲蒼生。絲蘿欲附千尋木。不是尋常兒女情。

庸脂俗粉太紛紛。義俠無雙自不羣。千古詞人非好色。甘心崇拜石榴裙。

鳳凰田興奎星六

能回驕貴起深謝。雄辨衛公害可瞻。投下革囊便投枕。更何奇相識虬髯。
沈沈屍氣居何畏。智定臨軒一問中。我却翻爲楊素德。多他踞坐見英雄。

灌雲田攬芸巖雲

楊家女侍拂持紅。能識英雄未遇中。喜有多情鍾伯敬。輕縑影爲寫驚鴻。
也似文姬遠贖回。不教流落在塵埃。羨他好事朱承爵。何待名姝始換來。
（戲用愛妾換漢書事）
沈香熏日喚眞眞。李賀詩沈香熏小像。金屋嬌藏一樣珍。三俠風塵今有四。朱家也是一奇人。
自矜獨得徧徵詩。我却吟餘進一詞。何不繙摹廣流布。好教人共賞芳姿。

丹陽朱翰臣步卿

盈盈秋水識英雄。密款幽衷月下通。笑煞當年卓氏女。傾心尙復待絲桐。
一代楷模認衛公。天涯知己兩心同。他年殿閣圖形事。早在嬌娘媚眼中。
王郎幾許誤娉婷。肉眼何分渭與涇。那得夫人傳相術。不教紅粉恨飄零。

蜂螭身世已滄桑。猶贖芳圖現曉妝。寄語太忙忙莫太。偷閒忙裏薦馨香。

益明宗姻阮紅拂圖徵詩和遜庸弟韻

奉賢朱家驊粥叟

正是羣雄角逐時。阿誰飲馬到天池。卿眞別具憐才眼。識得人間有可兒。
粥叟貪吟不肯廉。也噓凍筆寫眉纖。畫圖借取君如肯。莫遣紅紅笑此髯。

次韻酬答

太忙

一陽啓泰又春時。古畫容將貼錦池。欲見不妨吾有約。可能百首賞紅兒。
家度能傾示克廉。當時或恐愛眉纖。紅紅今倚儂身畔。未許君家效詭髯。

益明宗賢阮紅拂圖未肯借觀大箸和韻又以詭髯相誚粥幾索枯腸而未得一飽眼福忍哉

朱家驊

公也疊韻再申前請聊表貞心乞賜玉和

絢爛文章平淡時。十年面壁佛蓮池。紅綃自樂君家住。誰遣崑崙盜此兒。
公何一事不能廉。畫裏蠻腰尙愛纖。知否司空眞見慣。朝雲日日伴蘇髯。

疊韻再答粥叟

太忙

靚靚隴蜀并貪時。春水風吹縹碧池。拂妓本堪投石帚。只愁酸倒小紅兒。

紅拂集 卷二 紅拂圖詠上

八

佳士何妨色不廉。朝雲日侍詫身纖。畫圖我媿空臚列。竟被眞眞笑褚髯。

辛酉仲春讀紅拂圖和韻再題二絕

朱家驊

萬千筆陣各相雄。騷帖誰能幟拔紅。孤社南沙稱第一。苔岑聲氣一般同。

畫裏佳人比唱隨。風流儒雅信堪師。分明香草毫端蘊。不是尋常艷體詩。（太忙案以上各詩天香謠詩

鈔俱未載）

奉賢朱家駒題庸

曾傳閨閣識英雄。一鷺鵝溪想像中。恨煞秦淮柳如是。翻將身世誤髯公。
道是南沙鍾孝廉。丹青妙與曉妝添。葫蘆小押題名處。珍重君家付典籤。

益明宗嫺阮以鍾孝廉所繪紅拂圖廣徵題詠並賜讀題詞多首不勝佩服更贅兩絕卽請

榮政

能識英雄未遇時。臨卽相擬太差池。兒夫骨相凌烟在。怎比他家病渴兒。
妙擅丹青鍾孝廉。素毫描出翠眉纖。梳頭許我披圖看。願傍紅粧弄白髯。

次韻酬答

太忙

太息干戈擾攘時。癡心枉欲洗天池。應娘倘得供驅策。不稱文君列侍兒。
蘊籍風流朱孝廉。新詩吟遍彩毫纖。紅粧故故羞相見。爲有鹽溪兩白髯。

疊韻奉酬唐突西子聊博吟壇一粲

朱家駒

侯門如海託身時。姿媚潛虯想躍池。比似洛陽司馬后。風塵淪落嫁胡兒。
朱异何心太不廉。坐專尤物詫婦纖。眞眞畫裏虛標榜。賺取新詩玉局髯。
未必蛾眉樣入時。笑君虛費價裝池。不如慷慨瓊瑤贈。免諍人間狷狹兒。
強偷豪奪不傷廉。妙畫通靈繡襪纖。我有崑崙奴子在。紅綃作計取長髯。

又二首

前人

桑中有喜竊妻逃。鼎沸中原寇似毛。得似梁家紅玉否。軍門桴鼓學親操。
竟成眷屬有情人。兒女英雄往事新。我道越公自慷慨。門開放妓聽風塵。

疊韻戲酬遜老

太忙

千年麗質尙驚時。竟惹奸心起墨池。笑破賢昆爭作計。不將推倒醋瓶兒。
幾看大盜品能廉。平視橫來睨手纖。當日已邀閨閣懼。一髯今有兩虯髯。

紅拂集 卷二 紅拂圖詩上

一〇

長沙痛哭只傷時。麟閣勳名策硯池。若論聖門褻許語。猶兒我本是狂兒。
詩中微意亦傷廉。謔浪無端語轉纖。我懺太忙忙未已。霜毫酬禿萬虬髯。

又和豪真韻二首

前人

盡忠李氏肯名逃。自薦無慚趙國毛。一似留侯居虎帳。笑他梁玉鼓親操。
品花蕙事信畸人。詩筆紅顏兩斬新。我謂司空更恢廓。本家社稷等輕塵。

無爲朱雲櫛透天

鍾期既遇露神機。縱屬宵奔世亦稀。紗帽紫衣行月下。三星燦爛類于歸。
蘭躬欲許萬夫雄。豈顧楊公拂滅紅。如此風流如此智。秦樓楚館有誰同。

奉賢朱聲韶伯庸

虬髯才貌更非常。籠絡偏呼兄妹行。始識美人心計重。鍾情獨在少年郎。
記得敲門夜半時。一枝花好慰相思。阿誰豔福能消受。妬煞當年李藥師。

伯庸表姑丈初識面于會稽席上索閱紅拂圖戲成二截以獻即用尊甫粥叟舊韻想廉亭兩
前輩見之必掀髯大笑而不嫌又來唐突也乎

太忙

天介肇麟覲面時。興高采烈酒爲池。應誇眼福償今日。看取圖中絕妙兒。
網盡珠璣不礙廉。題成總覺語兒纖。青衫容易紅妝靚。虧煞人間有白髯。

益明姻兄賜觀紅拂小影並惠佳章依韻奉和

伯庸

清和天氣乍晴時。翦翦波紋水漲池。笑我此來饒眼福。披圖先要看紅兒。
美玉求沽價太廉。連番偷舉手纖纖。佳人也有英雄氣。愧煞吾儕具戟髯。

南匯朱壽延燮丞

當日侯門裏。何人識衛公。虬髯饒艷福。慧眼識英雄。劍影環聲細。燈殘月色融。欲知情景處。一幅畫圖中。
孝廉神妙筆。寫出態風流。繡幕牽紅袖。絲蘿訂白頭。濃情諧半夜。艷體詠千秋。夫壻凌烟閣。佳人名並留。
(桂馨室詩鈔)

南匯朱寶田現鈞

雖屬青衣實可兒。相從夤夜事非奇。卓文君後推紅拂。一樣風流兩樣思。

鎮江何煥華子英

紅粉多情一笑中。生成慧眼識英雄。潯陽適遇江州掾。別抱琵琶弄晚風。

天然顏色美傾城。顰笑風流百媚生。莫道相逢不相識。鄉須憐我我憐卿。
不用吹簫鳳侶來。蛾眉一見笑顏開。白衣邀得青樓盼。海燕雙棲對鏡臺。
艷說陶朱泛五湖。西施同夢亦仙乎。君甘嫁作書生婦。鏡對鴛鴦影不孤。

懷遠何國瑾子良

能將慧眼識窮途。信是人間女丈夫。羨煞品花仙史筆。丹青繪出美人圖。

安徽余 竊節高

零墨傳聞便慨然。不隨劫火化雲烟。再三句見深情護。難得前賢啓後賢。
風塵合豈偶然中。慧眼開占文軌同。窺透天心造時勢。不甘交臂失英雄。
詩因址弔四川營。我負幽燕俠氣橫。誰讓脚山成鬪禍。秦家白桿苦稱兵。
太原公子楊裘時。那許庸凡物色之。空望今人陳古藝。歌場此齣尙傳奇。

（清末予侍詩社於北京。曾以秦良玉遺韻得詩最富。自官三晉。謬兼文武。預測清亡。於市上得前人精繪百美人圖。公暇各題一絕。影射時事。而於紅拂會三致意。維時先嚴官秦。父子同台。清代所罕。故有秦晉一家。太原公子之譽。久隱於詩。倦眼風塵。以致近於青冢。四五年來。京伶來滬演紅拂。

轟動一時。今年辛未元日徵。適聞太忙此舉。率賦四絕。聊塞解紛朱亥之望。

廬江余靜超逸儒

閱盡豪華眼界空。片言早已識英雄。紅顏俠骨誰堪擬。多少鬚眉拜下風。
賦就聰明絕代姿。憐才慧性女中師。二分春色間相照。一轉秋波早暗期。謹論已傾風落落。纖腰敢效步遲遲。紅顏俠骨誰堪擬。未要尋常濁世知。

慈利吳恭亨悔庵

大忙老子忙何事。南匯畫師紅拂圖。百徧摩挲千鄭重。此圖十斛抵明珠。
篡取無煩古押衙。侯門亦產自由花。不奇紅拂奇楊素。解放先河相度誇。
賸墨填詞點絳脣。狂歌得寶喚真真。臚詩萬首印飛燕。託附仁和龔自珍。

太倉吳師善敏時

填出新詞意萬重。描摹形影畫師鍾。一朝冷肆無人識。不爲君容爲孰容。

當塗呂鑑秋竹影

剪水雙瞳秋不波。美人自信閱人多。若教中道相捐棄。縱是英雄可奈何。

名字無端喚出塵。紅塵不出定沉淪。皆因苦海波濤惡。喬木絲蘿願托身。

平遙宋攀桂馨五

風雲會合識英雄。旅邸金釵燭照紅。月下叩門來入座。天教義俠兩心同。

丹徒李石鈞石君

嶽嶽李藥師。高鶩雲中鶴。恥作章句儒。圖像凌烟閣。壯哉虬髯客。雄才多大略。立志清中原。足跡徧京洛。各具英武姿。謀面頗落落。紅拂妝理晨。曉烟籠芍藥。簾下看梳頭。客殊劇作惡。俊眼識英豪。通訊兄妹約。呼靖與坐談。觥籌互交錯。相將謁文皇。慘然滋不樂。爰訂相見期。開筵美酒酌。覩縷述平生。義俠重然諾。一妹室如懸。李郎亦落拓。龍戰輔眞王。功名何由博。綜計吾所餘。竊願解囊囊。女貴在從夫。夫極人臣爵。贈此爲妝奩。檢點交鐘鐻。觀此種種因。端由紅拂作。紅拂天人姿。大事能審度。宵奔風露中。終身欣有託。噫吁嘻。紅線助薛嵩。刀光何閃爍。以內記室終。相形後福薄。紅玉偶世忠。才力亦不弱。偕老隱西湖。聲華甘寂寞。巾幗雖多才。衡才咸不若。峨峨紅粉妝。粲粲胭脂萼。鍾生妙寫眞。傳出神飛躍。芳名千載香。靈光日灼灼。我公得斯圖。題句恣歡噱。永寶在子孫。慎勿輕拋卻。遠道徵予詩。聲乾喜報鵲。

嘉定李鏡熙輯美

識胆裙釵兩足誇。夜燈紅未掩窗紗。此身笑比隋堤柳。非復楊家已李家。

秦縣李慎維梓菴

緣定三生慧眼眞。登門來一布衣身。青田白鶴丹山鳳。不類尋常晉謁人。
不凡器宇自恢恢。小節無庸費忌猜。一轉秋波神獨注。卽將富貴卜將來。
時勢英雄相互造。適當隋祚欲更張。名媛數合歸名將。莫作巫山會楚王。
繪事拋荒歲月多。予性嗜作畫而未成。迄今擱筆已卅年有奇。而今莫返魯陽戈。有緣若得親瞻仰。
應惹當年愛畫魔。

投暗明珠莫自悲。乘時高蹈孰攀追。楊家閥閱今何在。生氣猶存一侍兒。
不求聞達在家邦。讀畫吟詩俗慮降。一見市歸因誌喜。那疑單幅不成雙。

宜豐李親仁慕魯

漫羨私情縷綫多。叩門當日意如何。風塵久歎無良士。月夕應憐惱翠娥。
客有豪雄辭燕幕。人來佳冶逐鷺波。丰神猶在圖中現。消受詞壇幾許歌。

潢川李嘉禾穉生

雙雙旅邸遇豪雄。一妹親呼曉日紅。我最愛他饒膽識。女兒近可有人同。
梳妝何礙睇相隨。太不圓通笑藥師。那及今朝老朱亥。收來一幅徧徵詩。
三層高閣供原恢。十載徵題事漫猜。畢竟吾宗多艷遇。千秋猶博瓣香來。

青浦李維藩秉心

女兒不作柔媚態。獨向英雄垂青睞。風塵三俠至今稱。圖中奕奕神猶在。誰爲此圖鍾孝廉。紫陽徵題遍
朋輩。唐家山河已幾更。何若芳名永千戴。

無爲李棟醉墨

私奔雖等卓文君。畢竟薰蕕自有分。巨眼能知眞俊傑。行權卓識異裙釵。
僅於一見識公侯。不爲繁華故主留。好似雲長歸漢帝。羨他秋水是雙眸。
身居相府鎖深幃。膽敢將身獻布衣。心服李君多厚福。不辭霜露賦于歸。
紅拂當年事有無。唐書紀載太含糊。圖成豔跡鍾家筆。却喜如今又姓朱。

平江李實蕃午雲

黃陂杜運昌熾盛

畫工恍若有神。韜筆下傳奇興自豪。一幅懸來人共賞。流芳百世等夔皋。最恨庸人見不恢。園花竟作野芳猜。情投與訂同車約。一笑千金可買來。平地登高方遂願。情深徹夜那知寒。旁人未解其中意。修到良緣萬劫難。指揮如意見非常。誰似薄情紙一張。留作奇觀垂不朽。也憑高燭照紅妝。

黃陂杜邁遠效皋

世間多少認難真。誤入迷途便失身。幾箇胸中懷卓識。榮膺鳳誥贈夫人。

青浦汪劍鳳葆華

藥師未逢時。祇與常人並。紅拂能識之。美目亦炯炯。當時隋末世。亂劇羣雄紛紛爭問鼎。尸居餘氣老司空。不足與謀已深省。毅然私奔就逆旅。終身願託絲蘿請。狐媚豈如張麗華。甘殉庸主從智井。他年夫婿圖凌烟。始知不與桑濮等。後有紅玉嫁蘄王。兩個紅粧青史炳。品花散人妙繪圖。繪出儀容端又靚。我爲太忙濡筆題。心香願拜亭亭影。

青浦沈其光瘦東

凌烟閣上畫元勳。幾個微時識使君。我羨藥師饒豔福。布衣知己一紅裙。

裙邊袖角書名徧。珍重題君此畫幃。誰道中原無女俠。蛾眉宛轉拜虬髯。（瘦東詩鈔我羨作我論）

南匯沈欽文瘦石

侯門如海花如錦。獨解憐才逆旅投。絕代風流堪羨處。英雄豪氣美人眸。
佳話流傳張出塵。書生愛慕忒情真。從今畫裏尋知己。不用狂來綁美人。（太忙先生有狂來我欲爲匪
去不綁財人綁美人之句故戲及之）

吳江沈昌眉眉若

裙釵巨眼漫云云。一妹方纔是識人。嫁得英雄定天下。夜奔莫擬卓文君。
萬首狂臚亦自賢。圖中留得美人緣。吾來要借畫師筆。補寫虬髯海外天。

杭縣沈舉清耳公

丰姿楚楚意閒閒。撥亂扶危一拂間。省識人豪幾男子。算來慧眼讓紅顏。
不用胭脂貌自華。易釵而弁亦堪誇。傳神況有鍾郎筆。舞袖翩翩襲絳紗。

吳江沈中路

士爲知己死。女爲悅己容。本非悅己者。何事忽相從。裙釵有慧眼。早歲識英雄。望門投逆旅。深夜獨追蹤。

開門延客入。脫帽露花容。自稱楊氏婢。執拂侍龍鍾。閱人遍天下。未有如我公。妾身欣有托。萍水得相逢。隋末羣雄起。首輔恣綺靡。粉黛列後宮。徵選及北里。解詩擅風雅。誰及康成婢。妙舞嫋絲竹。誰如東山妓。尸居歎楊公。祇知竊高位。儘有遠大材。未必能羅致。不期中幃中。乃具過人智。粉本圖遺容。千秋傳韻事。省識面春風。寶賁洛陽紙。我題此圖後。題外又生枝。近代言解放。有如馬不羈。盜香遺韓壽。抱枕侍陳思。祇圖身歡樂。不論才清奇。私奔成習慣。自謂合時宜。藉口爲紅拂。未免相其皮。偉哉梁紅玉。桴鼓顯雄姿。

福鼎卓 堅筆青

眼光一副邁尋常。畢竟楊家執拂孃。豈爲纏頭豪助錦。百年自訂譜鴛鴦。珍重生綃寫美人。畫工筆下最精神。妾憐李靖君憐我。一樣憐才出性真。

武進周葆貽企言

風流一妹薄楊公。絕代名姝眼界空。世上夜奔人不少。何人夫婿是英雄。

阜甯周龍章劍文

蕪風不動雲如羅。月光淡白瀉銀河。有美一人嗔雙蛾。侯門深鎖意云何。蓮漏丁冬報夜永。翠袖單寒香拂冷。踏遍中庭悄無人。滿墀瑣碎鋪花影。含情脈脈重踟躕。俠骨嶙峋看湛廬。念李藥師英雄徒。濃眉豪

目身魁梧。彼老令公屍居餘。此生誓不與之俱。此時岑寂芙蓉院。明河斜挂空中練。纖腰結束一尺強。爍爍秋波閃紫電。僂僂繞如出谷鶯。翩躚忽作摩空燕。太原孤館語喁喁。惟有嫦娥照嬌面。品花仙史筆有神。一幅摹出貌絕倫。美人事已千餘載。還從紙上呼真真。嗟哉仙史既仙去。此紙乃亦污緇塵。澧溪朱子費求索。爲拂緇塵供高閣。同爲憐才一片心。不遣美人歎流落。（小春雷詩鈔不載）

常熟周 瓘子燦

嬌姿慧眼紀當時。鍾建傳神粉略施。賦得娉婷無俗韻。描來斌媚有威儀。藥師遇艷名原著。竹垞題圖句更奇。從此風塵增二俠。千秋姓氏可同垂。

常熟宗 威子威

侯門如海夜三更。兒女英雄各有情。一拂能扶唐社稷。藥師夫婿仲堅兄。美人尺幅抵璠璣。識得相逢逆旅初。添箇吳中張伯起。一條竹杖一籃輿。紫衣帶帽態亭亭。越國尸居夢未醒。大手筆會聊小試。却題道士杜光庭。風塵三俠事模糊。潛脫侯門果有無。漫道藥師非百藥。（王應麟說）虬髯畢竟是虬鬚。（王應奎說）

松厂山人

醜雞處糞中。自樂若守素。豈知大鵬翮。飄然破雲霧。相賞在風塵。寧復知其故。試披紅拂圖。曠焉若有悟。英雄起草莽。安能拘故步。漂母飯淮陰。前徽宜景慕。吁嗟命世英。岸首方出胯。

梅縣林百舉一

尸居餘氣不須云。欹枕爐前却異人。妾自梳頭郎刷馬。此時意態孰如君。三兄安妹計良賢。十萬錢償一世緣。今日畫圖深穩住。東南龍戰又掀天。

福鼎林步蟾壽卿

妙手傳神勝鑄金。秋波轉處寓情深。美人骨格英雄膽。繪出憐才一片心。莫嗤紅粉逞風流。慧眼當年解自由。贏得知人成韻事。桃花顏色亦千秋。眷戀侯門不夜行。長隨執拂枉生平。倘非別向琵琶抱。今古誰知俠女名。

永陽林之美鐵花

潛跡侯門眼界空。獨能風鑒識英雄。功成繪上凌烟閣。遠勝屍居越國公。荒涼冷淡閱韶華。落拓風塵空自嗟。俠氣豪情人不識。忙中無意遇朱家。結綠青萍薛下知。直教聲價倍增時。紫陽從此留佳話。題徧人間萬首詩。

紅拂集 卷二 紅拂圖詠上

二二

古田林維周又聯

英雄紅粉兩投機。佳耦天成世所稀。多少翩翩裘馬客。垂青只與衛公歸。
慧眼能知一世雄。良緣敢藉葉題紅。夜深忽作抽身計。不怕侯門海樣同。
當年執拂令公隨。忽遇英豪李藥師。攜手同歸償素願。紫衣紗帽入新詩。

臺灣林維朝翰堂

相門一晤便依依。靜夜投奔叩邸扉。紅粉憐才真意切。太原並轡喜同歸。

樂清邵景毅質齋

美人名馬又英雄。都在蚪髯顧盼中。寫入丹青傳萬世。扶餘霞彩至今紅。

武進金榜振聲

苦學冥鴻著翅輕。女兒心地自分明。早知舊主難終局。頓改新妝賦遠行。豈獨熱腸稱義俠。復能慧眼識
豪英。嗟予十載風塵困。幾個憐才得似卿。

沔陽金大勳集成

拂拭人間萬斛塵。英雄氣槩女兒身。管教待旦戈同枕。漫道木蘭能替親。

想像當年意態雄。英姿瀟灑出塵紅。美人容貌才人筆。上下古今孰與同。
識得英雄卽與隨。快人快事可人師。非關好色心爲甚。題以芳詞綴以詩。
淮女興戎諳六韜。偏教巨眼識英豪。塵埃但許時時拂。聲聞于天下九臯。
私奔不避庸人嘲。嫁得英雄夙怨銷。名色宜爲名士配。追隨遑用綺筵邀。
前身經誦法華多。才得英賢伴枕戈。掃去欃槍天地泰。何須十萬劍降魔。
是真豪傑自風流。紅袖添香解百憂。修到幾生饒豔福。感唐佳話至今留。

無爲金繼文幼石

寶山侯大章廣堯

翩翩冠帶出風塵。眉黛猶窺臉際春。此去薦蘿欣有託。聰明畢意是天人。
茫茫世界總情癡。千古才人不自持。一幅鮫綃留倩影。萬枝湘管競題詞。
英雄畢竟惜英雄。慧眼爭傳識衛公。慢道聲華徒一世。猶餘顏色畫圖中。

蕪湖俞壽嵩鍾英

常熟俞琴友清

紅拂集卷二 紅拂圖詠上

二四

買得歸來倍可欽。徵求墨客短長吟。子期有幸留佳畫。伯虎多情遇素心。
（姓朱字才元宋華亭人）深入侯門真似海。忽逢俠士好彈琴。楊家拂妓垂青眼。早識英雄月下尋。

南匯姚永年 祖夔

茫茫大地幾蛾眉。骯髒風塵曠世奇。幸有鍾公傳妙筆。遺留千古識英姿。

東台姚 巍 嶺嶽

一見傾心數轉瞳。深情盡在不言中。夜奔豈背令公去。欲佐英豪立異功。
疎星三兩籟無聲。向著前程邁步行。莫道夜深天黑暗。此時慧眼特光明。

南匯姚行沂 雨塔

英雄紅粉共千秋。羨煞當年氣味投。夜半潛奔燈影穩。劍光環佩月悠悠。

高郵姜景伯 仰山

出塵何事夜私奔。拋棄朱門扣旅門。只爲賢豪能鑑別。遺傳佳話至今存。
芳名紅拂久流芳。繪出遺容想舊裝。不是丹青稱妙手。朱公何自喜珍藏。

江陰施民佑 翼人

侯門托足恨無窮。淚濕衣衫點點紅。一曲琵琶彈不得。放寬慧眼識英雄。
天亦多情願亦償。英雄美女好鴛鴦。於今柳暗花明處。繅繅繅樂未央。
越衛勳名豈足云。樊籠能脫是天人。買絲欲繡嬋娟子。除却臨邛便此君。
佳話流傳動後賢。畫圖省識亦前緣。勸君什襲須珍重。便恐飛騰也上天。

吳江柳棄疾亞子

崑山胡蘊石子

芳名也想託千秋。紅拂當年得自由。不負美人心上事。丹青願與寫風流。
漫將勳閥擬嬋娟。越衛人豪冷化烟。僥倖麒麟高閣上。何如片紙得人憐。
敢將紅拂比仙姑。仙俠分明是一途。男女避嫌終細節。天生仙俠豈能汙。

鎮江胡恩綬墨卿

六安胡天人笑佛

妙手誰將畫境開。更題好句當花栽。美人態度英雄格。日夕臨風憶幾回。
是誰能建補天功。謁罷公卿一笑空。博得美人成眷屬。布衣到此亦英雄。

侯門不信深如海。能任諸姬自去留。(不追紅拂放樂昌愚謂是越公闕達處)修到風流名將婦。美人顏色足千秋。

黛痕劍影兩悠悠。爲賦新詩解百憂。莫作淫奔章句讀。英雄兒女各千秋。

宜豐胡復全

多情費煞畫工夫。巾幗英姿存尺圖。千古美人應下拜。買絲能繡俠腸無。

南匯胡世楨幹生

司空侍女識英雄。五夜相投逆旅中。事隔千年誰想像。品花仙史畫來工。
替爾傳神筆未乾。魯朱家又結新歡。不知畫裏春風面。可有蚪髯俠客看。

無錫胡介昌茲儔

不奏求鳳不鼓琴。全憑英氣感知音。仙機將略原無種。紅粉青衫別有心。憶昨帳前燈吐蕊。伊誰門外月披襟。天公特降添毫手。繪出影聲值萬金。

從來神物不虛生。况是芳圖妙手成。容我綺窗分主客。賤他玉帶換公卿。吟紅細寫珍珠句。浮白狂斟琥珀觥。黃鶴題詩上頭在。青蓮學士亦移情。(西麓詩鈔乙集)

風塵墮謫閱年華。執拂依人老大嗟。脫卻樊籠憑慧眼。一朝奮跡謝楊家。

黔縣胡善仕達卿

南匯胡祥清庸齋

奇士有奇遇。良緣天不慳。風塵多白眼。知己一紅顏。月下奔娥影。燈前慰客鰥。功名在異日。雙騎出重關。身世感飄蓬。青衫紅袖同。俠情憐妓女。慧眼識英雄。豔蹟千秋上。芳容尺幅中。潁川傳妙筆。緣會及朱公。

南匯胡墨儒紅豆

今古幾英雄。風塵困頓中。紫衣來一面。綠髮映雙瞳。骨相嶙峋聳。心期宛轉通。羊羔羞酒陣。鴛夢說釵叢。眼或前生慧。頭應此夜蓬。鶯簧初細語。麟閣待豐功。密意絲蘿託。高情水乳融。祇愁窗送白。可惜拂拋紅。矯矯原如鳳。冥冥欲比鴻。音容尋爾渺。圖畫問誰工。鍾子摹神逸。文公擁豔同。徵題搜拙句。獨聽漏聲終。

東台韋永和致中

亭亭倩影畫圖工。多少柔情顧盼中。借問古今男子輩。幾人眼底識英雄。文君解聽求凰曲。侍女貪看壯士風。莫道知音勝執拂。憐才愛將意相同。

六合夏鷗濟川

郵筒千里遠徵詩。南雁朱公也太癡。想爲佳人情分切。狂題廿首粲花詞。

南雁奚紹頭 鐵棠

一見傾心兩意歡。權門巢燕豈常安。保身明哲應如此。莫作人間奔女看。
藏得斯圖品欲仙。眞眞不喚卽能前。尺縑豈是尋常物。恐有簫聲上碧天。

秦縣孫同德 警儒

歡解溫柔醉解歌。搜將軼事入吟哦。丹青一筆名千古。占得閨中福慧多。
夜半梭停織女機。古妝新樣認依稀。嬌藏金屋誰爲主。不是英雄不許歸。
了悟前緣續後因。一般妝飾一般新。黃金有價嬌藏屋。白玉無瑕慣拂塵。筆露春情名下士。神傳秋水畫中人。風流體態英雄氣。虧著詩家寫得勻。

無錫孫誥 鴻錫承

良宵嘉會有何奇。慧眼識人乃異姿。從此紅塵都拂撒。別饒春色護軍麾。

合肥孫家瑞 揖梅

誰把丹青奪化工。寫他兒女與英雄。畫成切莫將人去。瓶水香花付阿儂。

樊川孫 玉藍田

絲蘿從此託英雄。銀燭宵歸李衛公。不是桑間私約事。分明俠士美人風。

天津徐緒通一達

楊花落盡瓊花死。風好吹開穠彼李。巨眼豪門人閱多。褐裘未見佳公子。西京有客扣門來。越國延賢賓館開。枯骨塚中成底事。靈心席上知奇才。紫衣帶帽夜深走。素面年華十八九。伉儷有緣妾敢奔。英雄難遇郎堪偶。入門下馬看梳頭。不速客來髯似蚪。起義心同認兄妹。誅奸皆裂輕王侯。萬金讓妹儂行矣。國訪扶餘堪蒞止。黑白局鑿碁子輸。玄黃海戰真人起。女兒如此不虛生。有此賢夫有此兄。蜀市文君難並說。金山紅玉合齊名。賢豪巾幗斯爲首。寫入新圖眞氣有。弔古欣賡點絳唇。和吟愧乏題紅手。

無爲徐其鴻泳霞

檢點蛾眉隊裏人。毛嬙西子數來頻。問他燕瘦環肥者。誰把英雄認得眞。青蛾物色到風塵。一見賢豪便託身。旅邸叩門深夜裏。喁喁情話說來親。

青浦徐公修慎侯

一見傾心到衛公。屍居餘氣藐司空。風塵且作冥鴻引。海宇徐圖逐鹿功。三俠蚪髯結兄妹。千秋慧眼識

英雄。裙釵未畫凌烟像。栩栩傳神尺幅中。

青浦徐 松惺惺

舉世昏昏黑幕籠。天教寸柄授英雄。披圖喜見楊家妓。一片相思屬李公。
學道名山自有真。煉丹爐側養閒身。枕戈俠氣同心解。超出紅蓮歷劫人。

祁門徐 霈澤三

風塵早識英雄眼。紅粉叢中第一人。今日太忙重題句。興亡我亦感悲辛。

侯官徐 超肖慈

巨眼分明屬衛公。尸居餘氣薄司空。風塵早踐三生約。巾幗偏知一世雄。
初衷名傳千載成佳耦。賴有虬髯撮合功。
恥與徽昌同徽志。肯終越府貢。

南匯徐應鵬漢彬

猶是當年一拂紅。脫除尸氣事英雄。若教卓氏相逢日。低首甘心拜下風。

久仰先生才出羣。通家當日最知音。壁間片紙紗籠護。尙有光芒直到今。
(際唐先生爲余先大父縣花)

公得意門生會繪三代圖。余家至今寶藏之。

無錫秦景清鏡秋

龍戰中原一局碁。乾坤整頓孰扶持。沈幾閱徧人多少。大器今逢李藥師。
慧眼青垂執拂身。衛公才調本無倫。風萍邂逅情顛倒。始識英雄自有真。
情癡不爲禮拘牽。卓識何輸李亞仙。一見傾心委身事。流傳千古好姻緣。
慧心俠骨曠無儔。巾幗端推第一流。休笑自媒行放誕。英雄兒女各千秋。
侯門隱迹女中豪。藻鑑人倫識解高。我欲圖形瓣香奉。輸他鍾子早抽毫。

上海秦錫田適菴

楊花漫漫攪晴空。飛度巫山十二峯。豈爲孤凰求偶鳳。竟知尺鯉化成龍。
圖開粉黛濃如笑。劫墮紅羊慘不悰。輸與畫中人卓識。年年幽怨寫芙蓉。
(享帚錄卷四)

上海秦之濟伯未

看破李天下。楊花無復春。紅情厭羅綺。青眼出風塵。孟廟幾會幕。臨邛如此貧。
儀鸞殿何在。輸爾話昏晨。
裙釵幾許得知幾。一顧休輕換紫衣。若使不逢諸景武。太原難免夜奔讎。

古田翁守藩靜庵

孰識塵中蓋代姿。轉憐慧眼到蛾眉。論功衛國留名者。何不凌烟並畫之。

丹陽荆鳳岡 梧棲

鐘繇妙畫世稱雄。首唱新詞豔比紅。還作侯門青眼看。千秋遇豔一般同。
滄桑百劫夢魂隨。沈約傷心老妓師。我觸司勳遲暮感。流連韻事一題詩。

(鄙人垂老題此蓋不勝小杜
遲來之感)

侯門一見卽投機。寫出奇緣筆亦稀。惹得朱公迎一舸。五都歸勝五湖歸。
鍾君畫好掩文雄。染就胭脂一捻紅。圖裏眞眞呼欲出。畫看合與夜奔同。
紛紛鳳匹與鴉隨。香火靈山拜法師。却笑文君非慧眼。白頭相守枉吟詩。
丹青數筆盡天機。流落風塵賞識稀。曠世相逢一朱博。買將駿骨當榮歸。
蚪髯意態大王雄。庭上珍珠燭影紅。天與奇人工作合。行蹤絕異俠腸同。
紅妝扮作紫衣隨。付與雲間老畫師。博得鄉邦青眼客。一心傾倒廿章詩。

浙東袁 增石生

紅粉千秋效六韜。結交俠髯氣何豪。芳名自是人稱許。白鶴聲聞出九皋。

詩情畫意互相恢。坦白胸懷不待猜。事到爲難方見膽。一身躍自天邊來。

興化袁昌和鳳鳴

名流名畫寓真機。想見天人世所稀。若使三郎疎一盼。千秋誰豔賦同歸。
三俠圖中雌亦雄。不侔名妓線稱紅。情長兒女奚堪數。龍虎風雲會大同。
侍者私奔匪詭隨。丈夫幾許帝王師。標梅堪惜迨今吉。南國風謠合采詩。

平遙郝鑫海晏廷

楊家侍女太離奇。冠弁易笄夜半馳。慧眼早知天下士。叩門先賦白頭詩。
蹀躞侯門日幾回。美人名士意都恢。匆匆一瞬如冰鑑。能拔塵間王佐才。
韜鈴發跡帝王前。酒旆燈殘憶往年。海國遙傳多幻境。瓣香頂禮拜南天。

吳門高伯瑜

贏得三生有夙緣。相逢更喜正芳年。紫衣烏帽終成侶。璧合珠聯自在仙。
寫韻彩鸞才敏妙。凌虛飛燕舞蹁躑。偷教紅拂今猶在。拜倒榴裙願執鞭。

南匯康以穀葆頤

漱石居吟絕妙詞。兼長繪事重當時。圖看紅拂今猶在。業守青氈昔尙遺。那料渭陽悲寂寞。并教堂北累奔馳。舅父岳生公業。儒早世。僅遺一女。賴舅母郭氏矢志撫養。先慈時歸任。卹詎。而今寒食東風裏。濁酒 年年薦一卮。

聞昔秋風鏖戰回。泥金捷報越臺來。外王父登咸豐己未賢書。是科借浙闈鄉試。題爲子謂子夏曰女爲君子儒。合下一節。春闈下第緣奇數。絳帳

高材賴久培。外王父在京館於浙籍許。庚身家門下皆高材生。壯志未酬勤著述。良朋時聚樂徘徊。與顧趾卿丁時水諸公時相過從。猶留尺幅

人爭寶。爲溯遺徽劇可哀。

大庸歷萬選 蘇亞

愛葉情苗別有根。茶餘酒後儘消魂。衛公正有相如渴。賺得出塵賣夜奔。

丹徒張逢辰 費齋

菀枯顯晦有天機。身歿名彰在昔稀。絕代佳人仙史筆。不歸詩伯合誰歸。

沈淪何限古英雄。汨沒遑論到女紅。異世一般憐色相。如斯風誼幾人同。

自有生平不苟隨。狂且逸致兩堪師。拋開書卷忙題畫。傳檄騷壇索和詩。

心中所見原無妓。衷曲何堪盡喻人。日侍紅氈承色笑。一生已矣作陪臣。

安避鶯囀與燕啣。尊前一面早魂銷。決然擲却侯門拂。旅邸宵投不待邀。
深慚金屋阿嬌藏。頌禱隨人道壽昌。從此素存真面目。任他遺臭任流芳。
璞玉渾金自有真。憐才合讓女兒身。相公食客三千衆。省識斯文沒箇人。
書生風度故恢恢。列坐賓筵豈涉猜。豔福不虞天上至。飄然鐙下玉人來。
率臆傾談見胆肝。婆心俠骨動孤寒。直教千古多情者。顧影猶憐歎大難。

六合張官倬卓人

一見傾心李藥師。紫衣紗帽化裝奇。私奔肯戀侯門貴。不嫁英雄欲嫁誰。
雙雙青眼爲誰開。夜月三更旅邸來。卓識相如卿識李。一般紅粉解憐才。
繪得天然面貌真。偏教賞識在風塵。茫茫濁世誰知己。仙史狂生兩可人。
畫圖珍重合籠紗。十載藏嬌也足誇。料得衛公應見妬。如何豔福讓朱家。
(亦園詩鈔未載)

江都張揚芬幼屏

一代英雄李藥師。未經慧眼了無奇。那知賞識風塵外。不在男兒在女兒。
傳神晦叔認無差。幾度飄零閱歲華。頗似紅裙身有託。藏嬌新得魯朱家。

紅拂集 卷二 紅拂圖詠上

三六

留題定見多名士。抱膝何爲更有效。祇爲此翁同姓氏。不嫌唐突畫中人。

南匯張學義近闕

腸柔骨俠女兒身。慧眼偏能識異人。笑語自由諸姊妹。憐才只合賞風塵。
妙絕鍾生筆一枝。俠情輕寫在胭脂。紅妝若許披圖看。我是家風擅畫眉。
豔說琴挑司馬才。桑間濮上總前緣。狂夫莫漫批瑕玷。不是宵奔事不傳。

鹽城張社蔭孫

風塵閱盡少知音。歌舞侯門感不禁。侍座乍疑豪傑面。改妝誰識女郎心。
囚鸞繫鳳憐身世。俠骨柔腸冠古今。我亦青衫淪落久。得卿他日鑄黃金。

江都張錫芳頌年

天生英物應時機。個儻權奇世所稀。博得佳人明眼覷。一朝相遇卽依歸。
巾幗偏能態度雄。鬚眉幾輩愧顏紅。千秋生氣看猶在。不與尋常脂粉同。
偶然興到筆追隨。色相遺留感畫師。羨煞海隅朱處士。一朝豔遇廿篇詩。

昌黎張念祖諱箴

古來奇女多名紅。桴鼓金山紅玉功。盜盒紅線精神雄。紅紅度曲調絲桐。吾家紅拂名紅同。能識英雄風塵中。冢中枯骨嗤越公。夜奔易服何怱怱。郎君晨興調玉驄。胡來髯客氣如虹。坐看梳頭開雙瞳。呼兄呼妹衷曲通。萬金手贈囊橐充。助龍從雲虎從風。裼裘人來羣雄空。扶餘國立東海東。逢郎逢兄功業隆。端由俠女心玲瓏。披圖雅欽點綴工。保藏庸僅資紗籠。

江都張緩圖圖盒

柔腸俠骨女英雄。慧眼偏能識李公。閱盡侯門天下士。更無餘子在胸中。不用金錢買畫師。知音千載有鍾期。圖成漫說能維肖。鴻爪還留白雪詞。天涯誰解認真真。一幅飄零畫裏身。從此朱家留豔影。新詩題徧筆花春。披圖我亦感風塵。轅下棲遲幾度春。千里驂驢原不易。卽今伯樂更何人。

鹽城張文魁博齋

如花墮落軟塵紅。一入侯門色相空。蠟炬兩行歌舞處。幾人慧眼識英雄。紫衣烏帽夜相過。俠骨柔腸竟若何。攜手太原塵夢了。青衫紅袖兩情多。投入容易識人難。况在尋常巾幗間。不是當年能御李。千秋安得有紅顏。

讀書底事太匆忙。紅拂圖開細品量。遍示天涯淪落客。一般知己卜行藏。

宜豐張久士敬之

風塵誰復識英雄。俠骨柔腸豔說紅。逆旅輕敲投李子。侯門拋却鄙楊公。豪情莫話三生契。慧眼遙憐一代空。鍾氏丹青朱氏筆。奇才相遇賞心同。

六合張鍾亮器先

幸福於今實足誇。美人得見眼無花。何須覲面相談笑。已是人生樂弗加。

南匯張寶樹德森

漫崇歐化說維新。此是中華女俠身。寄語紅閨諸姊妹。瓣香合拜自由神。

六合張 臻澤芳

愛煞英雄氣概豪。情絲難斬不須刀。私奔欲遂于歸願。自賦天天一樹桃。先生幸福世間難。一幅丹青紙未殘。縱未當時親覲面。姿容得在畫圖看。

東莞張江裁次巽

紅粉直如廝養卒。低頭無計脫侯門。宵奔原爲謀依託。莫與桑中一例論。

江都張錫慶善夫
文君奔相如。千古歎奇偶。何如李藥師。叩門來螻首。若論紅拂識英姿。其事並與梁韓傳不朽。卽今女子婚姻自由說開通。能否別具隻眼風塵中。貧士由來寡儔侶。欲覓伯樂何處逢。不逢伯樂難空羣。相見應拜石榴裙。聞道此圖名手筆。飄零塵世空芳芬。走也倘遇但平視。什襲珍藏轉勸君。慎毋輕將眞眞喚。恐被君家焚素聞。

南匯張翼坛長庚

堂前佳客見英姿。執拂含羞有所思。辭托微波能達意。屍居譏語五更時。好事多從無意來。風塵知己解憐才。布衣畢竟成勳業。此是佳人眼力恢。

上海曹桐桐廬

一幅巴江古色箋。神工寫出態飄然。柔腸俠骨留千古。又結人間翰墨緣。天涯誰識美人心。斷粉殘脂萬劫侵。偶向塵實現色相。一逢佳士卽知音。

六合曹紹南醒齋

侯門誰復識英雄。慧眼相看俗士空。等是知音遇鍾子。至今豪氣羨髯公。

紅拂集卷二紅拂圖詠上

四〇

六合曹嘉詔金門

俠女解憐才。私奔伉儷偕。蒼天生俊傑。青眼出裙釵。靦面形疑活。披圖色更佳。紫陽藏一幅。金屋巧安排。

資興曹賢覺氏

慧人慧眼冠羣雌。能識英雄未達時。一舉竟垂千古譽。侯門深鎖有誰知。

鹽城凌春生子陽

鸞鳳雙雙結侶儔。佳人才子兩風流。不憑媒妁君休笑。須識婚姻重自由。此段因緣天配成。平分風月喜雙清。知音不待多言語。肝胆全憑一笑傾。

紅拂集卷三

南匯朱惟公編次

紅拂圖詠下

輿化許 鵬圖南

憑吊當年李藥師。蛾眉今竟屬伊誰。相逢眼底侯門日。淪落人間冷肆時。市骨千金酬綺願。鍾情尺幅寫狂詞。強爭豪奪凌千古。豔福平分一半兒。
贏得眞眞畫裏妍。皮藏憑仗阿誰憐。尋常繪色傳神處。猶是垂青執拂年。亦俠亦情私遁夕。宜仙宜佛自由天。紅綃偃蹇文君老。輸與卿卿福慧全。

江陰許詠仁頌慈

風塵莽莽識英雄。眼底全無楊越公。誰信侯門深似海。化裝一夜出樊籠。
汾陽橋下暫停蹤。張李今朝喜再逢。能令虬髯客心死。太原公子是真龍。
倩影亭亭落那家。紫陽後裔手中誇。無雙穩嫁王仙客。不用他求古押衙。

阜甯郭 鐸竹書

是真豪傑自溫存。卓識何妨夜叩門。一樣宵奔傳軼事。料應媿煞卓文君。
衛公偉論空今古。紅拂才華更軼羣。不世勳名不世藝。英雄肝胆美人魂。
嶙峋頭角超凡俗。一見傾心便有因。我笑綠珠無慧眼。墜樓終不足驚人。
楊公不是奇男子。羅致無非博笑歡。莫怪叩關情太急。風塵第一得人難。
命世胸襟似李郎。射南生小亦豪狂。畫圖一幅徵題咏。畢竟風流讓太忙。

無爲郭福如

梁姬亦自逐良臣。賴虎呈祥始識真。何似出塵雙慧眼。布衣隊裏覓奇人。

鄭陽郭 進鳴鳳

驚惶奔走漏沉沉。幸得金吾尙未禁。已有文君遺跡在。風流千古是知音。

江浦陳 洙珠泉

我披紅拂圖。懷古心慷慨。英雄未遇等庸衆。如劍在匣韜光芒。大業之末嗟色荒。迷樓夜擁千施嬙。邗溝
花片流不盡。中原戎馬悲倉皇。髯也態度虬飄揚。太原公子尤軒昂。此時一妹靜而睇。欲語不語神洋洋。
圍棋一局機勢張。猗歟鬪智心兵強。吁嗟中原今有主。拱手東去如鴻翔。天策上將何騰驥。世充建德皆

犬羊。唐家開國仗羣傑。藥師之力資紅妝。紛紛調語筆端掃。登善一傳何荒傖。夫餘霞彩映霄漢。巨燄直欲吞扶桑。前之紅線後紅玉。三紅成一增輝光。能于草昧具卓識。何殊太白知汾陽。柴妻寶妻知天命。巾幗奚遜鬚眉蒼。茲圖畫者鍾際唐。朱君得之永寶藏。劍光釵影照萬古。絹素之譽流要荒。方今神州慶統一。拂拭九域凝禎祥。請鎔劍戟鑄農器。女界參政侔姬姜。補天我欲思媧皇。

武進陳淵泊沖

風塵知己出閩中。脫屣豪華去似鴻。碌碌世人何足算。每將肉眼失英雄。(庚辛集)

南平陳守治瘦愚

多情我輩合推朱。廿首詩題紅拂圖。擬向君前問一語。畫中人入夢中無。

寶山陳祖方雪鷗

識見高人洵可兒。侯門執拂竟無知。一朝破壁飛騰去。恍似神龍天矯時。因緣兩字足相誇。金屋藏嬌願不賒。兒女英雄心賞識。更垂青眼到朱家。侯門莫悵路難通。竟有青垂柳眼中。潦倒風塵今不少。誰如紅粉識英雄。

海甯陳其謙亦陶

紅拂集 卷三 紅拂圖詠下

四

老去題詩筆褪花。任他箋紙委塵沙。倘煩一拂佳人袖。也抵新籠壁上紗。

東台陳 敏明仲

誰識風塵曠世才。一雙巨眼見丰裁。英雄落拓渾閒事。願托絲蘿慰汝來。是誰繪出夜奔圖。千古風流信不誣。如此靈芬塵世少。珍藏墨寶羨鵝湖。

合肥陳 俗谷人

垂紳堂上方驕士。執拂班中已識才。半世風塵憔悴客。忽驚午夜抱衾來。

海門陳 奎遜齋

裙釵交臂失人多。傑士英豪放眼過。慧俠紅娘傳韻事。丹青妙筆寫如何。

無爲陳 蔚華庶 著

嫣然一笑定銷魂。敲戶私奔豈諱言。佳話至今傳不朽。風流體態想溫存。欲遣愁懷趁事機。修成艷福兩相依。侯門鎖閉深如海。跳脫樊籠好奮飛。藏嬌金屋願難償。名將勳名到處揚。雲雨巫山情意厚。無人譏議說荒唐。

東台陳 永釗 壽仙

英雄青眼識英雄。大俠朱亥又識紅。今古雄材憑慧眼。風塵物色市塵同。
風雲筆掃喻龍韜。兒女情長一樣豪。牝牡驪黃空冀北。爭如相馬九方皋。

寶山陳祖衡天怡

水底潛龍困未伸。暫教躩屈溷風塵。誰知執拂侯門妓。巨眼英雄識得真。
柔腸俠骨女兒身。佐命元勳第一人。他日扶餘新建國。海天遙祝共酬神。

卽墨陳建熙樂亭

一見傾心便訂婚。更深悄悄出侯門。未勞司馬求凰曲。已得文君午夜奔。

吳江陸
颺醒恙

身入侯門慧眼高。偏從蓮幕識英豪。夜深絮語無人處。賺取衣冠計脫逃。
楊公久侍閱人多。俠骨芳心浪漫過。及早抽身成眷屬。好依喬木托絲蘿。

杭縣陶
鏞在東

女子所歡意各愜。豔遇不必屬豪俠。君不見。魯國兀者哀駘它。人盡願爲夫子妾。

南匯傅維中夢蝶

李郎艷福幾生修。月下敲環美自投。真個出塵名副實。出塵瀟灑事風流。
霧鬢雲鬟翠袖輕。雙蛾眉細色傾城。休言當日銷魂李。儂不風流見也驚。
桃暈雙渦笑也無。真真俏立弱難扶。癡情儂亦憐紅拂。願化輕紗護畫圖。

滿洲傅謙豫召公

越公筵上盡名流。一見英雄誓白頭。倘得凌煙分半席。美人大將各千秋。

南匯富銘鐘無驛

英雄自可配英雄。相見含情脈脈中。綠水青山堪作證。雙燈結蕊兩心同。
不能擇主不英雄。劍影燈光閃爍中。馬跡蛛絲增感慨。江山猶與昔年同。
橫飛劍氣氣豪雄。拋却流蘇錦帳中。艷福真堪千古羨。可憐時序不雷同。

岳陽彭 森少海

雅有惺惺意。靈眸識衛公。風塵惜豪傑。巾幗獨英雄。生氣猶如在。韜才數已空。故隨文士去。用博碧紗籠。

臺灣曾笑雲

剝啄聲中幸見迎。易妝連夜出西京。相攸別具知人鑑。三俠風塵拜女英。

南匯湯允莘雨蒼

侯門執拂抱深愁。莫笑侍兒未解羞。若不長安奔夜半。可能姓氏著千秋。不知李靖是何人。小妓居然肯托身。倘使楊公無暮氣。蛾眉深鎖畫堂春。

丹陽湯忠鑫雲軒

尸居餘氣笑司空。爲把終身託衛公。跡近文君情較俠。輸他冷眼識英雄。(眠雲樓詩鈔)

大通寧勤德不龜

匹馬追隨百戰功。縱然紅粉也英雄。千秋難得雙知己。今有朱公古李公。自古紅顏偏薄命。英雄未必定多情。畫中漫欲呼卿問。初見如何便目成。

合肥費志中葆庸

宵深萬籟寂無喧。客舍何人尙扣門。堪笑楊家紅拂妓。不憑媒妁自求婚。

興化鈕敦仁慕頤

五夜詞誰客邸通。紅妝掩在紫衣中。癡心但祝龍母吠。讓妾鶯鶯說寸衷。法習孫吳善將兵。從戎端合唱隨行。江心桴鼓如親執。紅玉他年證後生。

紅拂集 卷三 紅拂圖詠下

八

尋章摘句陋儒巾。奇貌能令玉貌欽。只怪留題詩句少。拂塵難搆袖紅人。

高郵童煦人和齋

孝廉妙筆善傳真。一幅丹青仔細論。豈似文君甘失節。私奔原不是淫奔。紅粉飄零冷肆場。幸垂青眼到朱郎。詩徵萬首題紅拂。郵遞紛披感太忙。

丹徒閔可仁少希

司空久待閱人多。肉食無謀可奈何。自顧孑身安所託。願依喬木長絲蘿。攀鱗附翼展鴻猷。位列黃扉壯志酬。不是名姝多妙算。怎教夫婿博封侯。婦從夫貴鳳雙棲。象服委佗飾副笄。回首當年諸侍婢。升沈今已判雲泥。唐家美女艷三紅。紅線紅綃託迹同。青眼特邀紅拂顧。傳神全在畫圖中。

無錫華重協西洲

裙釵慧眼出風塵。賞識英雄姓李人。獨惜前賢侍兒錄。不曾載得小名真。張星移駐李星邊。何必雙星專屬仙。人海若經卿一拂。盡教肉眼識英賢。

吳縣華精彬儒

烽燧四起亂紛紛。掃盪妖氛在拂塵。漫把隋唐分得失。只爭楊李一紅人。

江陰馮蘅蓀佩鑰

一入侯門深似海。全憑慧眼識英雄。憐才不畏多宵露。擇偶偏教逐曉風。悄語自陳紅拂妓。凝眸還誤紫衣翁。名花得主歡無限。比翼高飛脫禁籠。

休甯黃作楷壽人

英雄識英雄。寤寐常耿耿。裙釵遇知己。精鑑尤罔罔。出塵奔藥師。託身何機警。慷慨脫侯門。夜深風露冷。紅粉與青衫。雄心同一逞。雙飛過太原。策馬樂馳騁。功名成異日。千秋仰彪炳。品花有僊史。丹青攝其影。遺編冷市闌。流露星霜永。一入名人手。三生真有幸。同是美姻緣。披圖當靜省。畫中看寵佳。先生卽李靖。

蘇陵黃文琛雲門

英雄時未遇。青眼有裙釵。深不侯門懼。緣真萍水諧。枯楊戀奚益。濃李老堪偕。紗帽紫袍至。風流孰與儕。

興化黃敬碧園

出塵憑寫就。老筆亦清狂。紗帽敬青鬢。珠襦壓紫裳。芳心寧有匹。慧眼應無雙。千古憐才意。詩成奠一觴。

興化楊雪門橫山

紅拂集 卷三 紅拂圖詠下

一〇

塵中物色市中隨。艷福休誇李藥師。價長龍門登十倍。金迷紙醉好題詩。
百戰河山盼復恢。不矜小節別嫌疑。私奔究勝臨邛夜。豈是琴心挑逗來。
却奇拂子如柯執。假手爭如媒介強。謁客貌雖盧杞異。屏姬事味汾陽王。
女孩兒勇過人多。征戍木蘭也執戈。却怪虞姬偏不武。奪來慧劍斬愁魔。

越公帳下女英雄。眼界誰云與衆同。屢轉秋波具別識。可人盡在不言中。

大笑紅綃膽不粗。情腸俠骨世間無。品花仙史生花筆。多買胭脂畫此圖。

女郎爛漫率天真。慷慨蛾眉暗許身。拂去紅塵三萬斛。明珠肉眼笑凡人。
美人情感英雄淚。俠女豪增壯士威。掠燕隨風驚一葉。天桃甲帳賦于歸。
良緣實見亦恢恢。鄭衛淫奔且漫猜。驚壓金貂沽美酒。錯疑玉女自天來。

平遙楊星垣紫菴

崑山楊健高少芝

興化楊蔭廷紫舞

興化楊鍾衡湘九

鬚眉中。襖挾戎韜。索驥披圖氣亦豪。冰鐵英光橫殺氣。摩空霜隼下晴皋。莫謂波橫慧有神。莫輕看淡畫中人。方圓動靜如棋敵。勝算先操十著贏。

天門楊南春少梅

執巾妙妓識豪雄。面比桃花分外紅。想像當年情景幻。風神栩栩兩心同。夜奔幸有月光隨。彷彿文君是導師。休說藏嬌金屋少。卿思敲戶我敲詩。展開慧眼默知機。閱盡英賢歎世稀。披著紫衣人莫測。宵深之子喜于歸。一入侯門胆識雄。蛾眉隊裏狀元紅。抽身蓮幕秋波轉。兩美相投臭味同。忽遇知心樂倡隨。嫣然巾幗女中師。鶯聲悄悄溫柔語。都被騷壇寫作詩。名姝才子並忘機。儒雅風流見亦稀。信手揮毫傳韻事。深情款款賦偕歸。寫出凌雲絕代姿。揮毫相見意遲遲。綠窗紅蠟如花貌。妒煞當年李藥師。侯門深鎖鬱崔嵬。脫却樊籠亦快哉。不是衛公才絕世。肯行多露夜深來。目中餘子劇紛紛。天下英雄獨使君。合與虬髯號三絕。千秋巨眼屬紅裙。

臨川楊國琛寶丞

廿年落拓抗風塵。客邸無花負好春。願乞畫中人屬我。焚香百日喚眞眞。

酬答二截

太忙

憑君作意寓瑤華。才子臨川五色霞。只是眞眞深穩住。長安叵奈逐飛花。

從來女俠合能軍。尺幅爭題思不羣。憐我孤行增我氣。止戈相伴讀奇文。(時閱樊宗師集)

紹興楊肇瀛仙洲

英雄氣概美人心。兩好相逢不自禁。白日侯門猶執拂。黃昏陌路賦同衾。
自把標梅仔細吟。天涯淪落黯傷心。今朝得遇鸞鳳侶。不惜弓鞋曉露侵。
風塵隻眼識英雄。妙手描成奪化工。冷肆藏嬌知己少。得來奇福更無窮。

興化楊鍾實卓人

令公執拂女英雄。識李而今孰識紅。物色畫圖千載後。侯門却與市門同。
影黯緇塵金贖隨。朱家任俠足堪師。衛公艷福雖銷受。但解藏嬌不解詩。
蛾眉若使英靈在。百世知音感有人。采筆光分麟閣上。不消絲買繡功臣。

興化楊天和煦之

不用黃金賂畫工。鬢雲鬢霧面春風。焚香欲把眞眞喚。一幅新圖軟障同。
天生慧眼識英雄。一見心傾李衛公。不惜夜奔來旅館。娟娟花影月明中。
不甘溷跡在侯門。一遇知音便夜奔。我亦當今李百樂。畫圖一讀一消魂。

懷遠楊名賢士希

丹徒楊鴻年秋心

美人遇名士。一旦二難并。自昔歸楊氏。于今嫁李生。英雄才易識。兒女眼偏明。幸得詩和畫。何須公與卿。
(集定菴句)

江崑業 揆仲達

莫道宵奔兒女情。方因時勢覓豪英。中朝王氣多蕭索。珍重李郎萬里程。

臺灣葉子宜

逃楊投李契溫存。夜叩英雄月下門。願爲自由求解放。何人敢斷是私奔。

南匯葉壽祺貞柏

多買胭脂畫美人。孝廉遺筆艷千春。披圖不盡低徊意。暮出桃花窈窕神。

座上誰知李衛公。憐才女子識英雄。艷人艷事空今古。都付名流艷筆中。
身似飄萍貌似花。侯門羞障舊時紗。本來春色天難管。自去楊家向李家。
鄉賢手澤抵千金。兵燹風霜幾蝕侵。保護鄭虔三絕妙。後人心體古人心。

臺灣葉際唐文樞

雙扉輕叩藉春葱。爲薄楊公慕李公。窺戶文君差可擬。相如惜不是英雄。

宜豐鄒理之燮元

侯門執拂命途窮。閱盡豪奴眼界空。心薄楊家情早淡。身隨李子氣交融。
三更壯胆邀柔月。一片雄懷挽弱風。濁世幸逢知己上。千秋玉貌畫圖中。

合肥靳淑潛藝侯

逸士騷人屢表章。又推餘力及紅妝。無多暇晷供吟嘯。莫怪先生署太忙。
可憐傾國已成塵。猶有憐香惜玉人。如此情癡千古少。披圖竟欲喚眞眞。

秣陵管之樞運衡

天下紛紛何日定。英雄奔走困風塵。龍潛大陸誰知己。獨有裙釵識異人。

鹽城翟法乾健伯

飄零女俠等楊花。執拂侯門暗自嗟。能識英雄真慧眼。便生奇福到朱家。
鍾公妙筆畫名娃。鹿洞藏嬌罩碧紗。同是有緣分艷福。一番寫詠一番誇。

漢陽趙潤半跋

惟大丈夫乃有爲。是奇女子始能知。風塵易短英雄氣。羨煞三原李藥師。
俠骨柔腸不算奇。一雙俊眼大如箕。紫衣卸却華衣見。卽論容顏亦可兒。
更從逆旅識虬鬚。先見衛公慚弗如。委地髮長心獨細。似曾料定主扶餘。
目中早已舊官無。應笑紅綃胆不粗。隱語教人難領會。不逢摩勒願終虛。
美人死後遇鍾期。旣製新圖又譜詞。畫不得觀詞得讀。品花仙史足傳奇。
竹垞風懷想見之。藏嬌稠疊與題詩。太忙生轉閑情好。同上騷壇合偃旗。

侯門執拂幾春秋。閱盡世人非我儔。多少長安名利客。夕陽流水兩悠悠。
我生未必不逢辰。何用深閨恨自身。儒將風流從古少。一時難覓意中人。

崑山劉熙照曙東

傾人城國令人狂。無福無緣枉斷腸。主宰綱維原有定。兩人幸福比天長。
風塵落莫少人知。我見猶憐得意時。莫怪太忙忙未了。定盦比我更情癡。

武進劉 宏仲博

誰云兒女誤英雄。曾識英雄巾幗中。慧眼早能知己覓。俠腸羞與美人同。
聽琴一樣成佳耦。執拂中宵別令公。漫把風詩多露賤。千秋名字已留紅。

不數當年有綠珠。芳名紅玉久齊呼。請纓功業成良將。卻扇姻緣等老奴。
兄妹相逢深結納。英雄誓嫁不糊塗。漫將持合青衣比。一幅分明道子吳。

南通劉仲澤 匯清

蛾眉何惜溷風塵。願托絲蘿慧眼真。今日展開鍾子畫。得成眷屬有情人。
當年未奏求凰曲。竟立凌煙內助功。使我詩成紅袖拂。不矜卓氏識英雄。
紫衣若遇王摩詰。羅襪添描蔓草青。劍俠還將紅線比。太原一去跡如萍。

武進劉穀蓀 谷僧

熱腸慧眼女稱雄。會記侯門拂執紅。願把絲蘿托喬木。芳心從此二人同。

越公賓從威如雲。慧眼能將俠賤分。假使相如有琴意。憐才端不作文君。

嘉定潘文安仰堯

玉貌温存姿綽約。凝眸何事纏綿。不隨臺閣如梁燕。飛上枝頭蘿葛牽。
蓋世英雄時未遇。雕欄絳樹漫尋求。超然慧眼投知己。佐得勳名萬戶侯。

甘泉練雲樵鶴亭

羨君品格本清超。小憩申江遠市囂。購得名媛應寶貴。詩題金屋善藏嬌。

順德蔡守哲夫

物色英雄豈易求。紫衣紅拂倍風流。(溶)原爲之子雙瞳子。甘隸妝臺不自由。(守)

(辛酉九月二十有五。日於赤柱山中海騷閣。與舊時月色龕。茲芻夷古溶聯句。爲 太忙社長令題南匯鍾際唐畫紅拂圖。寒瓊居士蔡守并記。)

宜豐蔡亮成玉樹

麗質依稀笑語親。畫中玉貌莫非真。薰香合受狂生拜。慧眼如儂有幾人。

柔腸俠骨古今無。閱盡炎涼世態殊。落拓風塵人不少。更誰青眼到寒儒。
品花仙史足風流。繪到丹青韻事幽。譜入艷詞千載誦。賞音有客獨神留。
更誇覓句艷題紅。朱子才華一世空。似此知心人有幾。悠悠曠代數英雄。

宜豐 蔡振南 耀書

信是英雄共倡隨。李公紅拂兩堪師。朱君賞識圖中意。題上溫柔百首詩。

宜豐 蔡杏芳 麗春

牢落青衫孰賞音。紫衣紗帽玉人臨。豪雄曾向風前見。繡綵何妨月下尋。畢竟紅顏多慧眼。絕憐綺帳縮同心。畫圖此日徵題詠。別有閒情震古今。

宜興 蔣兆燮 梅笙

蛾眉青眼識英雄。餘氣尸居鄙越公。誰信三千年古史。自由戀愛早成功。
真氣淋漓戶牖驚。謁裘公子信豪英。負羈妻識文侯貴。一例千秋慧眼明。
阿兄棋局慨全輸。盡舉家財助妹夫。世上何曾絕奇士。空拳赤手枉嗟吁。
好奇尙俠有朱雲。珍重丹青志不羣。佳俠無靈名將死。神州何日靖兵氛。

江陰蔣學潛墓陶

俠士風懷仙女姿。令公猶自識卿遲。無端走卻千人俊。艷福輸伊李藥師。
眼看江山重搖落。楊花吹落不成春。朝雲未散荆王夢。猶擬銅臺獻伎人。
早識山河屬李唐。趨程行色辨微茫。故家回首悲零落。怕上荒臺吊越王。
品花仙筆艷圖中。名士風流鑒賞同。更數蘄王婦梁氏。千秋妬煞兩英雄。

臺灣鄭霽光虛一

侯門一入侍楊公。拂子拈來映袖紅。莫作尋常兒女論。風塵有眼識英雄。
娉婷生作女兒身。夤夜奔時歷苦辛。難得鍾朱雙管筆。詩情畫意妙傳神。
(朱太忙先生自題七絕二十首)

南匯鄭莖廣義川

紫衣烏帽畫圖中。知己情鍾李衛公。豈是私奔重紅拂。爲他慧眼識英雄。
品花仙史擅丹青。尺幅流傳姓氏馨。不信鵝溪朱學士。讀書忙裏護花鈴。

上海鄭永詒翼謀

紅拂集 卷三 紅拂圖詠下

二〇

莫與文君一例看。長安道上夜漫漫。許身竟向侯門出。如此紅顏下筆難。

無錫鄭翼堂子仲

淫奔自古最羞稱。濮上桑間寓創懲。惟有文君傳艷史。美人才子肯如冰。金谷園中常待宴。攤箋拂硯佐吟詩。如何百萬雄兵握。不屑樓頭一展眉。

青浦錢學坤靜方

英雄真契出紅顏。敝屣侯門去不還。贏得品花仙史筆。替留容貌在人間。當年意氣結風塵。千古爭推賞識真。今日置身圖畫裏。獨垂青眼豈無人。冷攤數載辱傾城。一眼何嘗顧俗儂。留意不經人意處。故應喚作太忙生。氣挾冰霜貌灼花。俠魂當亦戀朱家。但防巧賺來蕭翼。萬首徵題莫浪誇。

泰縣錢嘉穀競五

風塵三俠兩男子。一女昂藏俠更奇。慧眼明心獨千古。英雄不數數英雄。

金山錢霖雙呆

誰言兒女不英雄。敝屣侯門劇可風。識得李郎天下傑。千秋我亦拜紅紅。

常熟錢鍾瑜景周

南匯錢裕麟冰塘

歙縣鮑祖德桂菴

龍躍天門字勢雄。題詞感唱影搖紅。鍾家却有神來筆。賞識風塵便不同。

秋波慧眼識英才。裝束男兒入夜來。終勝孀姝奔墨客。早知李靖不凡材。

絕妙丹青筆一枝。繪圖如見夜奔時。不因慧眼能知李。何用徵求海內詩。

執拂披紅貌不同。丰姿端合配英雄。朱君得此鍾君畫。勝是藏嬌金屋中。

琴心俠骨出風塵。妙手拈來畫逼真。豈特英雄隨駿馬。從知慧眼屬佳人。

萬載龍賡言學圃

會稽鮑澐蓀亞白

顧盼光生雲水寒。無言相見以心肝。蛾眉具有非常鑒。莫作楊家執拂看。
筆有神來爲寫生。宵分細語悄驚聲。亦知意想當然耳。絕代深情畫不成。
從聞邂逅類情癡。不爲癡情遇合奇。大笑紅顏猶未老。分明寫入畫中詩。

自是美容宜入畫。何如金屋好藏嬌。詩家韻事風兼雅。長與書齋伴寂寥。

會稽魯晉藩寶齋

相逢萍水亦忽忽。心有靈犀一點通。(用李商隱句)不事王侯輕富貴。偏教女子識英雄。藏嬌非必誇奇福。(朱君有豔福平分李藥師藏嬌一載兩題詩句)題詠何妨媚畫工。漫道風塵少知己。一般豪氣貫長虹。

無爲盧 璧連城

一是名姬一客身。爲何夤夜狎相親。寫來滿幅神情肖。畢竟當時識見真。佳話風流傳韻事。奇緣邂逅總前因。英雄知己尋常事。可慨憐才到美人。

武進諸懿德秉彝

名場蹭蹬歎如何。到處遭人白眼多。孰意憐才花解語。情深一往射秋波。自歎身同薄命花。兢兢常恐鳳隨鴉。風塵難得逢知己。羞作潯陽妓抱琵琶。懷才不遇淚潛潛。顧影猶憐身似繇。不謂布衣投刺客。遽邀青眼到紅顏。俠骨嶙峋李藥師。如花相見竟情癡。半腔愁緒一腔血。應共平原繡買絲。

河南韓應辰

美人名馬又英雄。信是江山間氣鍾。紀事早披紅拂傳。論勳曾拜紫泥封。風塵俠義超隆古。開創規模邁等庸。絹素流傳桑海閱。蒼然寶繪比璜琮。

上虞羅煥藻佩芹

美人慧眼識英雄。不與臨邛遇合同。紗帽紫衣豪媚態。居然摹入畫圖中。品花仙史妙題詞。省識抽身蓮幕時。更有幽人知護惜。幾經珍賞寫新詩。

合肥關和甫

蒼茫大地無知己。徒使英雄坎珂深。慧眼忽開巾幗裏。好逑從此樂愔愔。侯門暫辱智超羣。慧眼能將貴賤分。縱是抱衾猶有譽。千秋足愧卓文君。

上海嚴昌堦載如

列屋閒居粉黛叢。汗青留照拂痕紅。楊家恩寵尋常耳。心事憐才便不同。女兒巨眼識英雄。開國元勳屬此公。逆旅燈花對人笑。可能併入畫圖中。

南匯嚴惟式幼廉

紅拂集 卷三 紅拂圖詠下

二四

憐才卓女琴心領。愛逐春風嫁文杏。何如楊公執拂姬。獨具慧眼識李靖。自入侯門似海深。指使維命少恩幸。瞥彼權貴如屍居。奄奄餘氣雙目眚。紫衣紗帽行喬裝。嫦娥奔月夜悄靜。蕭館忽聞剝啄聲。一介書生心惕警。披衣急起試問誰。中天牛女星耿耿。開門乍見偉丈夫。倏現廬山妝明靚。錯疑天上降嬋娟。芙蓉嬌面修蛾整。含羞宛轉述來意。絲蘿願訂百年永。李郎豔福幾生修。鴛鴦好合壯圖騁。吁嗟一妓勝公侯。能識英雄在俄頃。飛黃騰達決他時。凌烟閣上名彪炳。品花仙史工丹青。寫出當時真情景。天彌缺陷到情天。喜冠平生留倩影。紫陽何幸得此圖。文房樂事快心鏡。

如泉巖 潛隱吾

恍親霧鬢與風鬢。可奈披圖人正繇。我亦風塵落拓者。訴情何處遇紅顏。

德化蘇育南石書

精光寶鑑比心機。如此聰明曠代稀。何幸佳人遇吉士。清才豔福兩攸歸。侯門深鎖女英雄。窗外桃花映面紅。慧眼應經秋水濯。取人才智鏡般同。

甯雁願 漫少伯

女兒慧眼出風塵。亙古由來有幾人。寄語當今諸姊妹。莫教草草誤千春。

南匯顧德鈺韻夔

欲奪鸞篋奈此身。侯門席上綺羅春。等閒無數英雄閱。慧眼分明只一人。
漫教司馬琴心動。那用崑崙鐵背飛。月下凌波燈下貌。美人膽識古來稀。
傾盡談心笑語陪。探囊同覆掌中杯。風塵三俠論交日。那有楊公屍氣來。
儘看夫婿快封侯。人物班中第一流。贏得千秋名士筆。畫圖著意在雙眸。

海安顧玉麒吉人

出塵風韻寫神機。賞識市塵世所稀。堪羨先生多豔福。嬌藏金屋早攜歸。
全憑美目識英雄。拂玉後先說兩紅。底事釵裙能救國。維持殘局慧心同。

無錫秋 厂稻村

研朱寫影太紛忙。色相參來向綺妝。鶯燕也知花意緒。英雄無奈月昏黃。
露霜夙夜奇情富。山水懷思韻語荒。輕鬢窄衫疑雨什。次回原不是清狂。

詞

定遠方壽昌筱亭

紅拂集 卷三 紅拂圖詠下

二六

俠骨柔腸。美人自恨知心少。珠圍翠繞。不向侯門老。公子才豪。意氣相憐早。願終了。山迴路窄。邸舍追隨悄。
(點絳脣和鍾際唐原韻)

海陵王 治亞東

嬌小解溫柔。嚶嚶歌喉。春光易老使人愁。座上英雄謀面識。慧絕雙眸。戴月覓鸞儔。俠骨風流。情絲一縷繫心頭。漫道侯門深似海。心去難留。
(浪淘沙)

合肥王鼎銘禹堂

春色最宜人。春光到眼新。淡妝濃抹自停勻。整整。梁空燕逝。桃花流水。別恨無垠。春眠眠未得。春夢難成。美人芳草最消魂。耿耿。風流雲散。鶯聲燕語。啼喚多情。
(醉春風)

平遙王育慶仁甫

識人微時。侯門奔出託身早。風清夜悄。欣聯比翼鳥。聞道畫圖。寫出意深宵。片幅老。神情了了。妙筆古今少。
(點絳脣)

奉賢朱家驊弼叟

益明宗姻阮得紅拂圖謂亦有夙緣題詩二十篇志藏嬌艷福多情若此不畏吼獅耶爲用鍾孝廉

題圖點絳脣原韻以博 一粲

紅拂佳人深閨埋沒知多少。光陰飛鳥。容易鶯花老。畫裏眞眞。青眼相逢早。獅來了。河東非寶。嘖語牀頭悄。

錢塘吳聽猿耳似

胆識無雙。世間如此紅顏少。擇林鳴鳥。願伴英雄老。粉膩脂香。俊眼窺人早。綠諧了。足音深宵。昏暮流鶯悄。(點絳脣和鍾孝廉原韻)

步隋堤問粉香脂膩。羅綺盡成烟。午夜相投。權門不羨。肝胆千古爭傳。願紗帽紫衣奔競。論才識雅俗太相懸。將相微時。英雄困處。裙屐筵邊。休訝紅顏嫵媚。卽知人俊眼。壓倒嬋娟。富貴浮雲。風流絕世。况是丰度嫣然。看一樣良禽擇木。藥師這豔福亦天緣。八座夫人。迴思歌舞華年。(一萼紅)

歙縣吳承烜東園

一笑披圖。風塵如此奇人少。使逢青鳥。比翼應偕老。畫得蛾眉。認得蚪髻早。逃楊了。壻鄉潛窺。客舍藏春悄。(點絳脣和鍾際唐先生原韻)

誰是英雄。誰是昏庸。分明眼中。怪屍居餘氣。笑伊楊素。天生麗質。妬爾花紅。慧鏡澄懷。智珠在握。心契三

原李衛公。超脫處嫌消纖芥。音賞焦桐。休疑軟障圖窮。但喚真真見玉容。想蛾眉美眷。菁華發洩。虬髯俠客。邂逅遭逢。粉黛描摹。丹青點染。有否黃金賂畫工。昭君怨。甚魂歸夜月。面識春風。(洞庭春色)

歙縣吳清麗又園

兒女英雄。憐香惜玉情多少。擇枝棲鳥。芳訊催春老。慧眼靈心。識定相奔早。更深了。客窗幽管。目轉驚魂悄。(點絳脣和鍾原韻)

平遙宋攀桂馨五

月下敲門。燈寒旅邸人蹤少。空山啼鳥。惟恐春光老。女界英豪。慧眼知人早。心傾了。獨行人宵。深夜沉沉悄。(同上)

潢川李嘉禾穉生

識得英雄。閨中能有人多少。幽籠嬌鳥。偏向侯門老。雅遇鍾期。畫稿安排早。圖成了。姿態幽窈。如晤芳心悄。(同上)

阜甯周龍章劍文

前代嬋娟子。驀飛來丹青一幅。呼之能起。羅袖低垂環佩裊。閒煞蛾眉趾躄。念歌舞終非長計。抱月飄煙

腰緊束。締良緣。今夜吾行矣。消受了。藥師李。老奴賸有屍居氣。費譏嘲。盈盈笑語。眼橫秋水。參取品花仙史筆。穩稱英雄舉止。突狂妄而今女士。鼓盪自由吹解放。究何曾識得奇男子。亦不過盲從耳。（賀新郎）

紹興俞尚志安之

慧眼天生。國家大事關心早。閱人多少。盡是難偕老。邂逅英雄。連夜追隨好。天緣巧。意真聲悄。義俠千秋道。（點絳脣）

吳興姚洪淦勁秋

中幃有英雄。慧眼居然識衛公。鄙薄口居無足畏。猶龍。天矯擎雲舞半空。寫入畫圖中。三絕名傳說姓鍾。拱壁視之真不啻。箱籠。密密收藏疊疊封。（南鄉子）

秀縣孫同德馨儒

本是天臺仙子。無端小謫蓬萊。月明林下美人來。露出風流體態。悄聽鶯聲燕語。妝成杏臉桃腮。黛眉青眼一齊開。識得英雄氣概。（西江月）

織女停機橋駕鵲。一年一渡牛郎。紅顏易老便殘妝。個中無限意。誰與訴柔腸。惟恐雞鳴天欲曙。剩留

月照空房。英雄兒女總流芳。一般豪俠氣。梁玉遇斯王。(菩薩蠻)

南匯徐守清耐冰

兜鍪坐老幾名賢。盾鼻欲磨穿。莽夫怎解愁鄉味。恁平生無分情天。誰信英雄遲暮。偏多兒女因緣。目成眉語畫樓前。消受美人憐。黃衫博得青衣寵。舒慧眼物色爭先。豔說擔帷韻事。還教粉墨增妍。(風入松和顧少伯韻)

平湖袁潛雁梅

楊家妓。鑒別英雄風塵裏。風塵裏。侯門冠蓋。目無餘子。私奔恥與文君比。笑伊差解絲桐意。絲桐意。只圖歡合。寧知倫理。(憶秦娥)

吳縣張榮培植甫

自古英雄每失意。慧眼垂青。翻出裙釵裏。紗帽紫衣來月底。叩門但覺鶯聲細。暮地相逢驚又喜。軟語溫存。云自楊家妓。跳出侯門甘姓李。勝他紅葉聯佳壻。(蝶戀花)(惜餘春館詞鈔不載)

江都張揚芬幼屏

好事朱家。偶逢豔畫人間少。鳳毛靈鳥。僅見推鍾老。舊韻新聲。披覽嫌非早。嘖真迹。祕藏深窅。想像余

懷悄。(點絳脣和鍾孝廉韻)

常熟陸寶樹醉樵

舞扇歌衫兒家添得愁多少。年華尙小。肯向侯門老。能識英雄眼底心雙照。鼉更悄。紫衣紗帽。夜走長安道。(點絳脣)

旌德湯 英俊生

廁身紅拂事王侯。紫府學歌謳。英雄難遇鬚眉。空有多少閒愁。孰知月老良緣定。蓮幕兩心投。依依情話。叨叨私語。無限風流。(眼兒媚)

青浦項 寰涵公

堪歎如花妾貌。深藏似海侯門。樊籠逃出黯銷魂。幸可人兒相近。明月樓頭豪客。凌煙閣上奇勳。風流放誕卓文君。尙是庸脂俗粉。(西江月)

高郵楊遵路鬢漁

執塵身輕。出塵兩字名兒好。布衣傾倒。似此憐才少。剗啄敲門。旅夢驚回早。披圖稿。漫疑天曉。月印弓鞬小。(點絳脣)

紹興楊肇瀛仙洲

閱盡滄桑。生成慧眼何人曉。杜鵑啼老。惟有英雄少。無意窺簾。一見傾心儀表。風清日皎。細訴柔情裊。
(點絳脣)

無錫鄒錫祐篤周

誤落樊籠。等閒負却春多少。弗如飛鳥。忍令韶顏老。乍見高材。脫縛偏能早。心期了。足音空杳。想像丰儀悄。
(點絳脣和鍾孝廉韻)

宜豐熊發元朝初

侯門誤入容顏老。惆悵恨偏深。英雄李子。相逢頃刻。願結同心。千秋艷事。獨標慧眼。話播儒林。當年寫照。今朝覓句。一樣知音。
(青衫濕)

興化劉思鞠瘦儂

星月迷離。一天涼露沾多少。叩門聲小。怕爲多才惱。只爲憐才。情把心兒繞。難除掉。特來相擾。願侍終身老。

剔亮銀燈。原來紅拂佳人到。似卿多少。知己憑誰料。逃出侯門。應怕人知道。迴眸笑。任他圈套。已遂儂

心了。

一幅圖兒。筆尖寫出佳人貌。不關花草。爲羨知機早。遲莫空山。知己天涯少。誰知道。替他寫照。紙外心思好。

寥落紅塵。如君名士風流少。夙緣真巧。妬煞他人了。算此才人。方許佳人笑。題詩妙。百年傳道。紅拂圖兒稿。(點絳脣)

宜豐劉心如鏡秋

藻鑑無差結並頭。紫衫紗帽夜相投。品花仙史。綵筆繪星眸。千載知音誰復是。庸奴難與話溫柔。太忙朱子。雅興契風流。(琴調相思引)

泰縣劉敬奇山

世漫鄙青樓。清濁相投。桃花輕薄逐長流。請把圖中紅拂玩。品節雙優。慧眼識王侯。君子好逑。不知豔福幾生修。偕老榮華真個尠。五福齊收。(浪淘沙)

古歙潘逸園鶴僊

淪落風塵。感懷身世愁多少。落花啼鳥。容易催春老。能識英豪。旅店相逢早。宵深了。月明人窅。劍影環

聲悄。

當日侯門。麗人體態于今少。可憐啼鳥。遮莫愁春老。慧眼能豪。得識英雄早。篇開了。梨園聲啞。宛轉歌

喉悄。

俱是英雄。昔年三俠風塵少。美人如鳥。只有虬髯老。志氣何豪。圖畫流傳早。難忘了。夜歸人窅。記取鶯

聲悄。

（周浦朱子太忙。徵題紅拂圖。久未有報。昨夕偕友往觀張藝員妙聞所演之風塵三俠。妙聞飾紅拂。如初寫黃庭。恰到好處。客館無俚詞。以張之用南匯品花仙史鍾斯威孝廉自題紅拂圖韻。卽所以報太忙也。）

宜豐蔡璧瓊林

塵海知音少。侯門寄恨窮。春花秋月望成空。乍見賢豪李子快相從。躍馬同歸里。攀龍獨建功。果然慧眼識英雄。猶見柔腸俠骨畫圖中。（南柯子）

泰縣閻震中范范

誤入侯門深院悄。春風秋月人偏老。空識了。五陵少。惆悵殘花風擾擾。得見王孫早。且抱琵琶別調。俠

士美人皎皎。古鏡千秋照。（應天長）

武淮諸懿德秉彝

千秋情史。最動人歌泣。英雄兒女。好事多磨。從古恨。半爲名花耽誤。萍水相逢。蓬山不隔。莫把佳期負。風塵知己。何妨慷慨身許。自歎海樣門深。美人遲暮。顧影憐淒楚。鵲侍儕。身歌伎輩。誰識花能解語。有客踵門。無媒執伐。幾莫聯鸞譜。夜深人靜。定情快賦詩句。

紅顏青眼。記背人偷覷。匪伊朝夕。惆悵侯門深似海。知己風塵難得。羅綺叢中。簪纓門裏。餘子都糟粕。人中騏驥。無端邂逅相值。只看俠骨嶙峋。如虹意氣。懷刺來投謁。韋布立談。卿相取。旋見亨衢蜚翼。落魄英雄。封侯夫婿。交臂休輕失。風流佳語。至今嘖嘖稱說。（念奴嬌）

高郵韓道明恕思

一轉秋波。英雄預識風塵裏。去楊歸李。自古真無幾。漫笑私奔。艷事徵隋史。誰修此。美人知己。合是奇男子。

芳草天涯。誰人可結同心好。燕昏鶯曉。肯在侯門老。客底相逢。月下髯兄笑。奇緣巧。取諸懷抱。馬踏長安道。（點絳脣）

紅拂集 卷三 紅拂圖詠下

三六

潛江曠世斌公質

冷眼觀人。可兒却怪朱門少。不煩青鳥。一面甘偕老。
暮地相逢。偏覺相知早。傾心了。院幽窗窅。閒話中
宵悄。(點絳脣和鍾孝廉韻)(萬卷艸堂漫稿未載)

常熟龐仕榮園

巾幗英雄。紅顏青眼憐才少。布衣文藻。慧俠期偕老。
艷溢縉毫。仙史鍾情早。宵深了。珮環聲窅。低語獨
愁悄。(點絳脣和鍾孝廉韻)

南匯顧俊少伯

侯門晉謁少英賢。慧眼望將穿。美人未必傷遲暮。暗吞聲泣問青天。一拂堪風終古。五更孰假奇緣。蚪
髯斜睇畫樓前。一見便生憐。要郎霽怒惟憑手。將來事微露機先。圖讓孝廉專美。花難姊妹爭妍。(風入
松)

閨秀

鄞縣王韞秀

戀愛於今重自由。却教紅拂擅風流。未操冰鑑人倫識。那得明珠不暗投。

聞道孤墳今尙留。芳魂何事獨埋幽。空傳艷迹無憑據。儂爲斯人一引愁。

巴溪朱芳渠湘蕊

馬逢伯樂識驪駒。愛道佳人粉一缸。羨煞忙生多艷福。筆花丰韻得無雙。

鄞縣周儀英

美人慧眼識英雄。洵有奇才翼衛公。千載醴陵碑石在。春風秋月弔張紅。

金華金令儀

俠骨柔腸窈窕姿。量才玉尺自操持。臨軒一問超人識。出谷遷喬洵未遲。

南雁姚 瀛楚英

功勳未樹快知音。清夜追隨艷福深。千古梁張堪媲美。（君自題有梁識斬王張識衛句）奇情俠骨倍心欽。

侯門夙昔識英雄。冷肆者番故識紅。莫笑太忙狂太甚。千秋知己一般同。（楚英詩存）

上海孫妙真

楊家侍史拂持紅。能識當時命世雄。悄向五更投逆旅。佳人今已作冥鴻。

美女喬裝夜叩門。衛公驚喜欲銷魂。自云妾是楊家妓。願託松蘿效彩鸞。

寶山張寶媛

中山麥寶英

託跡權門作侍姬。量才應已盡當時。李郎洵是人中傑。夤夜投奔總未疑。

鄞縣錢美楳

披圖喜復見嬌容。想象當時邂逅逢。便識李郎真不錯。絲蘿終許託喬松。

鄞縣龐秀娟

執拂臨軒算已操。誦來戶版認蓬蒿。敢嫌行露侵羅襪。怕惹春風罩紫袍。如此情懷原淑雅。笑他戀愛濫時髦。李唐稗史三紅俠。誰最風流格調高。

紅拂集卷四

南匯朱惟公撰

紅拂詩話

予勞人也。終歲迄無暇晷。前圓圈詩。承姚君養怡代錄。始獲付刊。比友人屢詢及紅拂詩。去秋囑內阮傳君榮耕繕之。眉目稍清。乃援前例。草此篇附後。將予所樂誦者。胡亂述之。佳什如林。亦何能盡舉耶。民國廿五年二月朔。太忙生謹識。

吾謂虬髯公好色。尤甚於李靖。愛護一妹。無微不至。推屋烏之愛。因及李郎。此髯真是妙人。遜庸宗丈句云。恨煞秦淮柳如是。翻將身世誤髯公。此髯不比那髯。柳娘失足。誠可痛恨。髯公寵盼一妹。而不奪人巨愛。此是英雄過人處。謂非真好色而何。清耿齊賢云。億萬貲財交一妹。多情有禮是英雄。以多情有禮稱之。洵然。

吳梅村詠虞令云。博得美人心肯死。項王此際是英雄。予每愛誦之。胡笑佛云。博得美人成眷屬。布衣到此亦英雄。又云。修到風流名將婦。美人顏色亦千秋。蓋美人名將。皆令人熱羨。莫可軒輕其間。故兩詠之。史慕山云。李公畢竟真豪傑。賞識居然到美人。林壽卿云。贏得知人成韻事。桃花顏色亦千秋。張博齋云。

不是當年能御李。千秋安得有紅顏。或重美人。或重名將。皆是。

士人多好色。惟有好色於文字。而不好色於物者。若徒從文字求之。此笨伯也。王子淵云。不願封侯惟好色。愛卿欲覓問天公。張蔭孫云。我亦青衫淪落久。得卿他日鑄黃金。一則充爽。一則感慨。（圓圈詩集中有某女士狂詩二首。見者議予不當錄刊。予謂此詩即係女士所作。亦且未遑議。况又未必果出女士之手。若置其他可議者不議而獨議此。抑何所見之不廣耶。）

凡人自有本真。山林廊廟。各赴前程。莫可強致。予日在塵全亂紙堆畔求生活。每誦柳亞子詩云。勸君什襲須珍重。便恐飛騰也上天。輒惕然以驚。愆然汗下。

奚鐵棠云。尺縑豈是尋常物。恐有簫聲上碧天。嚴載如云。逆旅燈花對人笑。可能併入畫圖中。邵質齋云。寫入丹青傳萬世。扶餘霞采至今紅。此爲詠物詩中妙品。均能參以活句者。又秦適齋云。圖開粉黛濃如笑。亦然。

知機不易。賞音尤難。必也能賞音而後能知機。能知機者。未有不能賞音者也。丁伯屏云。天生雄警過人處。不在知機在賞音。然能賞音而不能知機者。世亦有之。抑可云賞音不易。知機尤難。余節高云。窺透天心造時勢。不甘交臂失英雄。知機之謂也。

胡石予云。僥倖麒麟高閣上。何如片紙得人憐。李梓恭云。楊家閹閹今何在。生氣猶存一侍兒。麟閣勳名不如片紙。宰相世家。不若侍兒。言之亦可憐矣。生氣二字妙。正對屍居言。俞鍾英云。漫道聲華徒一世。猶餘顏色畫圖中。三家詩同趣。

夤夜私奔。羌無顧畏。逆旅之中。忽來大盜窺人。此最吃驚處。設不有以處之。立遭失敗。而紅拂不慌不怯。視若無覩。此時把虬髯公已玩之於手掌上矣。吾謂虬髯公之心死。見紅拂已然。何待於見文皇。惟此心死。與彼微異。一死於英雄之精采。一死於美人之妖麗也。林一厂云。妾自梳頭郎刷馬。此時意態孰如君。沈瘦東云。誰道中原無女俠。蛾眉宛轉拜虬髯。如見其形。如歷其境。虬髯對之。安得不死心塌地耶。袁子才云。籠絡虬髯偏有術。相公才少妾才多。句則佳矣。微嫌太露。不若林沈二君之作爲蘊籍也。予亦有句云。此日相看懷抱盡。何如席地睇梳妝。一則心死。一則心醉。心醉亦卽心死。林詩由亞子鈔寄。未見手蹟。自平等自由之說興。詩禮之教廢。男女失足者日多。至可憫念。朱步卿云。那得夫人傳相術。不教紅粉怨飄零。顧少伯云。寄語當今諸姊妹。莫教草草誤千春。二君頗具菩薩心腸。周企言云。世上夜奔人不少。何人夫婿是英雄。吾亦亟欲一問之。凌子陽云。不憑媒妁君休笑。須識婚姻重自由。蔣梅笙云。誰信三千年古史。自由戀愛早成功。紅拂允稱成功。若今人之自由戀愛。半多失敗。去成功尙遠。

張近鷗云。笑語自由。諸姊妹。憐才只合賞風塵。張德森云。寄語紅閨諸姊妹。瓣香合拜自由神。以紅拂爲自由神。最爲確切。趨炎慕勢之風。不獨婦女爲然。卽七尺男兒。亦莫不皆然。欲求相賞於風塵。尙難得諸鬚眉。吾於巾幗。又何誅。史慕山云。絲蘿欲附千尋木。不是尋常兒女情。尋常女子。一見尺木。便以爲岑樓。卽欲附之。而不知世有千尋之木。哀夫。閔少希云。自顧孑身安所託。願依喬木長絲蘿。長字好。長之對。卽今所云墮落是矣。

金集成云。美人容貌才人筆。上下古今孰與同。此君眞能好色憐才。知其甘苦者。夫美人之貌。才人之筆。所以可貴者。正謂其古今不同。若古既有之。今亦有焉。斯又何足貴乎。且美人容貌。世皆輕易視之。惟才人知重焉。才人文筆。世亦輕易視之。惟美人憐惜焉。故美人之與才人。互爲性命。一而二。二而一者也。

詩貴翻案。愈翻愈奇。愈奇愈妙。田星六云。我却翻爲楊素德。多他踞坐見英雄。吳悔晦云。不奇紅拂奇楊素。解放先河相度誇。皆翻案也。妙在有至理。而田先生之作。尤爲雄警。英氣逼人。岑嘉州所云功業當須激也。清俞綵裳女士云。楊公應悔聽奇計。未得功成失美人。亦妙。

民九暮冬。亞子集蜺江之迷樓。醉題兩律。郵示四方同文。予亦繼作。刊成迷樓集。都係壯烈溫馨之作。印先生詩云。難怪索詩羨紅拂。意中人定畫圖妍。自注云。前月君爲友人徵題紅拂圖。故及之。卽指予事。蓋

田詩由亞子代徵。

韓恕思點絳脣云。美人知己。合是奇男子。人但知得美人知己者。卽爲奇男子。而不知美人亦卽是奇男子也。王佐才云。夤夜憐才到李家。奇男子卽美人花。或曰木蘭亦可以此七字詠。然木蘭忠孝則有之。憐才則未也。予詩所謂孝心儘有熱腸難。熱腸比孝心更難。朱粥叟云。卿真別具憐才眼。識得人間有可兒。憐才須別具隻眼。固未易言。嚴載如云。楊家恩寵尋常耳。心事憐才便不同。盧連城云。英雄知己尋常事。可慨憐才到美人。卓聳青雲。妾憐李靖君憐我。一樣憐才出性真。周劍文云。同是憐才一片心。不使美人歎流落。所言憐才都妙。

辛未春。予爲先嚴七十正壽徵文。荷袁石生先生惠貽花鳥一幀。風神淡遠。饒有別致。彌可寶貴。並附題紅拂詩。有云。事到難爲方見胆。一身躍自天邊來。躍字妙。將軍自天上飛來。美人當亦隕自天上。世間豈真有美人耶。楊鷺舞云。驚壓金貂沽美酒。錯疑玉女自天來。英雄所見相同。才人亦爾。雅言系述云。乾德中。左補闕王伸知永州。僧虔康持詩謁。王覩其老醜。試以詩。時積雪初消。命咏之曰。時人莫把和泥看。一片飛從天上來。伸驚曰。其旨不淺。予謂此詩亦可移詠紅拂。

閔少希云。不是名姝多妙算。怎教夫婿博封侯。封侯之功。歸之內助。的切不可移。楊湘九云。方圓動靜如棋。

敵。勝算先操十箸贏。亦謂紅拂善算。傳中計之詳矣四字。卻爲此君拈出。得其神理。紅拂計而後行。非若今之女子輕舉妄動。一味盲從者比。

一二八後。予在辣斐德路周公館課讀時。戲書小紙條。黏馬路電桿上。徵求國學同志。忽荷萬戴龍學圃先生投簡酬和。詩筆殊超拔。知爲宿儒也。句云。亦知意想當然耳。絕代深情畫不成。鄭質庵云。許身竟向侯門出。如此紅顏下筆難。胡復全云。千古美人應下拜。買絲能繡俠腸無。均極力寫畫之之難。正所以極力尊紅拂也。

龍老又云。詩家韻事風兼雅。長與書齋伴寂寥。亦知吾耽孤寂而無聊。故假徵詩以消遣。

郭竹書云。莫怪叩關情太急。風塵第一得人難。王啓懷云。臨軒指吏頻頻問。莫謂儂家是病狂。賞音之切。斯知機之亟也。

孔志怡先生。初會於蘇垣。由奚挺翁紹介。長身玉立。鬢鬢有鬚。詩筆頗波峭。有句云。南沙竟獲傳神筆。欲效蚪髯看曉妝。在他人固平淡無奇。出之先生。則殊雅切。

陳瘦愚云。擬向君前問一語。畫中人入夢中無。蓋疑我也。予自少性乖僻。花信之年。尙未近女色。所遇無當意者。人以書癡目予。內外親懿。莫有見愛。何況他人。常獨往獨來。孤立于世。故先問業倪斗老贈詩云。

落落常欲往。矯矯自不羣。予深覺賞音之難。一朝得是圖。大喜。因以徵題。是有感而徵。非有得而矜也。市骨千金酬綺願。鍾情尺幅寫狂詞。嗚乎。吾每讀許君圖南之詩。泣下沾襟。憮然久之。明嘉興布衣王翊。有秋槐堂集。其漂母祠云。平生自恨無知己。千里來尋漂母祠。予之徵題紅拂。亦同此意。

陳明仲云。英雄落拓渾間事。願託絲蘿慰汝來。妙妙。英雄自甘落拓。世無識之憐之者。獨有美一人。令忽垂青睞。相憐於世俗驪黃之外。由其識英雄之真。是以氣味相投。鍼芥契合。蓋英雄亦豈願儉父來慰藉耶。

閩秀詩。予愛龐王兩女士作。王韞秀云。未操冰鑑人倫識。那得明珠不暗投。又云。空傳豔迹無憑據。儂爲斯人一引愁。紅拂子虛烏有。女士蓋知之。清王良士詩云。唐書兩種難憑信。況且虞初九百篇。華西洲云。獨惜前賢侍兒錄。不會載得小名真。亦謂此。龐秀娟云。李唐稗史三紅俠。誰最風流格調高。

女子所歡意各恆。豔遇不必屬豪俠。君不見魯國哀駘它。人盡願爲夫子妾。此陶在東先生所作。絕妙。紅拂有奇趣。此詩亦有奇趣。得未曾有。先生擅樂府。今之東維子也。顧惠書謂予風流絕世。令人泚頰。太忙之風流。既異於登徒子。亦萬不及哀駘它也。吾於哀駘它。有餘羨焉。

隨園云。不是文君才絕世。相如琴曲有誰知。文君妙人也。乃今題紅拂者。輒欲伸此抑彼。似未得其平。柳

亞子云。買絲欲繡嬋娟子。除却臨邛便此君。家硯鋤叔云。卓文君後推紅拂。一樣風流兩樣思。不分軒輊。與予意正同。然自是文章之妙用。非真欲抑文君也。使作文君題。則擲管者又欲抑紅拂矣。故予詩亦有云然。原不足爲訓。

長洲女士陶善字慶餘。著有瑤樓吟稿。詠鸚鵡云。一夢喚回唐社稷。千秋留得漢文章。兩典合成一聯。雄渾獨絕。爲時傳誦。宗子威云。一拂能扶唐社稷。藥師夫婿仲堅兄。蓋脫胎於此。亦警句也。此君詩頗雄厚。爲予畏友。辱惠簡希時通音問。而予卒卒未暇裁復。爲歉。嘗閱淮海英靈集。常熟桓棻有句云。欲買黃金鑄買島。爲渠詩句足魂銷。願以移贈宗君。用表欽慕。

袁子才嘗稱姻緣二字。可補聖經之遺。予亦謂然。杜熾堃云。旁人未解其中意。修到良緣萬劫難。予與人寡緣。更何所謂良緣。良緣誠不易修哉。每誦此句。爲之黯然。

侯君賡堯。荷代徵諸女士詩。故有一幅鮫綃留倩影。萬枝湘管競題詞之句。侯君執教滬南。近在咫尺。而尙未一晤。予之疏慵可知已。

古人好事。不讓後人。後人好事。亦豈肯讓古人耶。劉曙東云。莫怪太忙忙未了。定盦比我更情癡。小寺所謂人間亦有癡於我是已。

顧韻嬰云。風塵三俠論交日。那有楊公屍氣來。如此寫屍氣。方見沈著。

靜志居詩話云。崇禎巡撫宋一鶴歿。有妾金陵陳氏。以色藝聞。門客王屋聘焉。謝參政上選先期娶之。徽州貢生程奎作詩嘲曰。前身定是烏衣燕。不入王家入謝家。一時傳誦。葉貞柏云。本來春色天難管。自去楊家向李家。李緝芙云。此身笑比隋堤柳。非復楊家已李家。亦復用典切合。吐屬風流。

胡墨卿云。男女避嫌終細節。天生仙俠豈能污。夫男女太避嫌固非也。太不避嫌亦非也。惟確能自立。信譽已孚於人者。避嫌可也。不避嫌亦可也。否則卽畢生避嫌。人仍未之敢信。奚益。若仙俠如紅拂。世果孰得而汗之哉。

秦鏡秋云。風萍邂逅情顛倒。始識英雄自有真。又云。一見傾心委身事。流傳千古好姻緣。林鐵花云。俠氣豪情人不識。忙中無意遇朱家。何子英云。莫道相逢不相識。卿須憐我我憐卿。傾蓋如故。千古傳爲美談。予騫覩是圖。真如舊識。惜乎影也而非人。誦范石湖花定有情堪索笑。自憐無術喚真真之句。堪爲解嘲。姚頌嶽云。莫道夜奔天黑暗。此時慧眼特光明。慧眼二字。用黑夜託出。格外有力。離黑暗而見光明。其慧力真不小。不特眼之光明而已。

張費齋云。絕代佳人仙史筆。不歸詩伯合歸誰。孫馨儒云。嬌藏金屋誰爲主。不是英雄不許歸。張卓人云。

私奔肯戀侯門老。不嫁英雄欲嫁誰。吳敏時云。一朝冷肆無人識。不爲君容爲孰容。四君用意略同。清李淑儀女士詩云。若使專房承寵愛。肯行深夜換粧來。予亦有句云。若使風情同石尉。綠珠紅拂姓齊芳。與俞女士意同。

諸秉彝云。半腔愁緒一腔血。應共平原繡買絲。悲壯。

蔡玉樹云。薰香合受狂生拜。慧眼如儂有幾人。甯不孤云。畫中漫欲呼卿問。初見如何便目成。鈕慕頤云。癡心但祝龐毋吠。讓妾鶯鶯說寸衷。楊少梅云。休說藏嬌金屋少。卿思敲戶我敲詩。皆楚楚有致。琅然可誦。

華彬儒云。漫把隋唐分得失。只爭楊李一紅人。紅人二字。誰不知爲大人物之代名詞。而此紅人獨不然。却係一弱女子。大是奇事。

亡友湯君雲軒嗜酒工詩。聰穎絕倫。喜作豔體。所著眠雲樓詩鈔二卷。予爲釀資刊傳。句云。跡近文君情較俠。輸他冷眼識英雄。冷眼二字妙。若作慧眼。便一落千丈。平庸可憎。

百美新詠中有會稽羅橙塘云。倘使秦王更相遇。不知心折定何如。其文是而其言則非。使紅拂見更優於衛公之人。便爲心折。此不足爲紅拂矣。須知紅拂祇願爲名將姬妾。萬不願爲帝王妃也。予有句云。一

妹深藏良有意。恐和敷女識襄王。亦同羅作。呂竹影云。若教中道相捐棄。縱是英雄可奈何。更屬過慮。眞英雄定不爾爾。劉魯芹云。假使相如有琴意。憐才端不作文君。此言最佳。確能知紅拂娘心事者。樊樊山詩有云。須知彩鳳求凰意。不爲文君不鼓琴。使衛公遇文君。司馬遇紅拂。各不當意。必不能強合也。又有某君作曰。於今理想當時况。半是嬌羞半恐惶。詩句頗佳。惟於此題不合。予爲刪去。殊覺可惜。存之則使阿紅有知。定必曠怒曰。何嬌羞何恐惶之有。

錢靜方云。留意不經人意處。故應喚作太忙生。趙半跛云。太忙生轉閉情好。同上騷壇合偃旗。兩君用意略同。惟趙君下句獎借溢分。僕何敢當。

蔡哲夫云。原爲之子雙瞳子。甘隸妝樓不自由。民十冬仲。予沈河新愈。得蔡先生談夫人聯句一絕。佳甚。喜出望外。惟記爾時談夫人似尙未隸妝臺。則此聯也。原夫子自道耳。

劉仲博云。漫把風詩多露賤。千秋名字已留紅。孫藍田云。不是桑間私約事。分明俠士美人風。王佐才云。私奔不是桑中約。贏得英名萬古誇。張次溪云。宵奔原爲謀依託。莫與桑中一例論。李梓恭云。名媛數合歸名將。莫作巫山會楚王。丁左卿云。寫入丹青人宛在。莫教誤認是淫奔。葉子宜云。願爲自由求解放。何人敢斷是私奔。關和甫云。縱是抱衾猶有譽。千秋足媿卓文君。袁翔海憶秦娥云。私奔恥與文君比。笑伊

差解絲桐意。此皆爲紅拂作護身符者。可謂紅拂知己。

鈕慕頤云。只怪留題詩句少。拂塵難遘袖紅人。劉匯清云。使我詩成紅袖拂。不矜卓氏識英雄。予亦蓄此心。只願美人識我。不必冀其親我愛我。若欲美人親愛到窮措大。恐世上萬無此美人。故予紅豆約指詩云。美人自古心如鐵。莫費胡天胡帝思。閑情賦所謂坦萬慮以存誠。憩遙情於八遐。非能覺悟。聊絕妄念耳。

潘仰堯云。超然慧眼投知己。佐得勳名萬戶侯。沈眉若云。嫁得英雄定天下。私奔莫擬卓文君。皆從大處落墨。

張費齋云。異世一般憐色相。如斯風誼幾人同。又云。直教千古多情者。顧影猶憐歎大難。予偶然好事。而張君竟以風誼稱之。是亦多情多義者。否則烏能道此。

陳后山詩云。不惜捲簾通一顧。怕君著眼未分明。蓋嗤肉眼也。怨極矣。明唐六如云。莫道英雄今沒有。誰人看着眼睛中。句雖俚。殊感慨。華西洲云。人海若經卿一拂。盡教肉眼識英賢。陳泊冲云。碌碌世人何足算。每將肉眼失英雄。徐泳霞云。問他燕瘦環肥者。誰把英雄認得真。章致中云。借問古今男子輩。幾人眼底識英雄。張博齋云。蠟炬兩行歌舞處。幾人慧眼識英雄。王雪亭云。應是生來有俠骨。女兒幾個識英雄。

楊鷺舞云。拂去紅塵三萬斛。明珠肉眼笑凡人。並嗤肉眼皆妙。又清馬伯和云。一見便能知國士。笑人索駿只驪黃。亦深嗤肉眼也。

諸君題詞。都有羨我者。如郭竹書云。畫圖一幅徵題詠。畢竟風流讓太忙。許頌慈云。無雙穩嫁王仙客。不用他求古押衙。楊仙洲云。冷肆藏嬌知己少。得來奇福更無窮。翟健伯云。能識英雄真慧眼。便生奇福到朱家。張頌年云。羨煞海隅朱處士。一朝豔遇廿篇詩。荆梧棲云。曠世相逢一朱博。買將駿骨當榮歸。林鐵花云。紫陽從此留佳話。題徧人間萬首詩。王子淵云。無怪太忙忙太甚。珍藏奇寶信無雙。蘇石甫云。何幸佳人遇吉士。清才麗福兩攸歸。顧吉人云。堪羨先生多豔福。嬌藏金屋早攜歸。陳雪鷗云。兒女英雄心賞識。更垂青眼到朱家。陳明仲云。如此靈氣塵世少。珍藏墨寶羨鵝湖。楊少梅云。信手揮豪傳韻事。深情款款賦偕歸。練鶴亭云。購得名媛應寶貴。詩題金屋善藏嬌。鮑桂菴云。朱君得此鍾君畫。勝是藏嬌金屋中。劉彥儂點絳脣云。夙緣真巧。妬煞他人了。朱湘蕊女士云。羨煞忙生多豔福。筆花丰韻得無雙。古人知己。紙上良緣。處士虛聲。文人薄福。皆可作如是觀。

張澤芳云。縱未當時親靚面。姿容得在畫圖看。秦鏡秋云。我欲圖形辦香奉。輸他鍾子早抽毫。何子良云。羨煞品花仙史筆。丹青繪出美人圖。遜庸宗丈云。梳頭許我披圖看。願傍紅粧弄白髯。美人不可得而見。

得見畫圖斯可矣。是人之矜癡。亦人之無奈也。至張器先云。何須覲面相談笑。已是人生樂。弗加更情見乎詞。秀色欲餐矣。

吳悔晦云。百徧摩挲千鄭重。此圖十斛抵明珠。王少雲云。有心人自留心賞。幾度牽情此畫圖。重畫也。胡石予云。不負美人心上事。丹青願與寫風流。重美人也。各有見地。均入題中。

張緩圖云。千里驂騑原不易。卽今伯樂更何人。張博齋云。遍示天涯淪落客。一般知己卜行藏。金振聲云。嗟予十載風塵困。幾個憐才得似卿。陳亦陶云。潦倒風塵今不少。誰如紅粉識英雄。嚴隱吾云。吾亦風塵落拓者。訴情何處遇紅顏。蔡玉樹云。落拓風塵人不少。更誰青眼到寒儒。又云。似此知心人有幾。悠悠曠代數英雄。蔣梅笙云。世上何曾絕奇士。空拳赤手枉嗟吁。又云。佳俠無靈名將死。神州何日靖兵氛。胥以感慨出之。唾壺擊碎。不堪卒讀。

遣詞用意。有相同者。如楊紫薇云。屢轉秋波具別識。可人盡在不言中。凌子陽云。知音不待多言語。肝胆全憑一笑傾。何子英云。君甘嫁作書生婦。鏡對鴛鴦影不孤。曹桐廬云。柔腸俠骨留千古。又結人間翰墨緣。錢競五云。慧眼明心獨千古。英雄不數數英雄。曾笑雲云。相攸別具知人鑑。三俠風塵拜女英。湯雨蒼云。若不長安奔夜半。可能姓氏著千秋。張近鷗云。狂夫莫漫批瑕玷。不是宵奔事不傳。林壽卿云。倘非別

向琵琶抱。今古誰知俠女名。史慕山云。千古詞人非好色。甘心崇拜石榴裙。金集成云。非關好色心爲甚。題以芳詞綴以詩。張圖奩云。閱盡侯門天下士。更無餘子在胸中。袁翔海憶秦娥云。侯門冠蓋目無餘子。諸秉彝念奴嬌云。簪纓門裏。餘子都糟粕。

胡茲儔云。吟紅細寫珍珠字。浮白狂斟琥珀觥。此二句足以表示諸君豪情佳句。興復不淺也。

鄭義川云。不信鵝溪朱學士。讀書忙裏護花鈴。羨我也。朱步卿云。寄語太忙忙莫太。偷閒忙裏薦馨香。勉我也。

用侯門者。如林又耕云。夜深忽作抽身計。不怕侯門海樣同。許頌慈云。誰信侯門深似海。化裝一夜出樊籠。黃雲門云。深不侯門懼。緣真萍水諧。王亞東浪淘沙云。漫道侯門似海。心去難留。王佐才云。如何執拂楊家伎。嫁李偏能得自由。亦隱隱言侯門之深也。

有用布衣者。如郭福如云。何似出塵雙慧眼。布衣隊裏覓奇人。沈瘦東云。我羨藥師饒艷福。布衣知己一紅裙。諸秉彝云。不謂布衣知己客。遽邀青眼到紅顏。楊巖漁點絳脣云。布衣顛倒似此憐才少。胡笑佛之作別見。

清席韻芬女士云。李郎一笑逢雙絕。天上蛾眉海外龍。此以虬髯爲龍也。陳雪鷗云。一朝破壁飛騰去。恍

似神龍夭矯時。姚勁秋南鄉子云。猶龍。夭矯擎雲舞半空。此乃以紅拂爲神龍。亦無不當。

楊寶丞云。願乞畫中人屬我。焚香百日喚眞眞。孫揖梅云。畫成切莫將人去。瓶水香花付阿儂。遜庸宗丈云。不如慷慨瓊瑤贈。免諍人間狷狹兒。欲奪我畫中寵愛者。大有其人。予是以有千年麗質尙驚時。竟惹奸心起墨池之句。非敢唐突。聊用相諛。

鄉邦文獻。罕見留意。識者病焉。予撥拾殘簡。歷有年所。獲暇擬加整理。彙爲海曲叢牘。又擬搜集先哲書畫。影印海曲先哲書畫遺編。倘假以時日。會當有所纂就。葉貞柏云。保護鄭虔三絕妙。後人心體古人心。余節高云。再三句見深情護。難得前賢啓後賢。僕媿未能也。願學焉。

張卓人云。茫茫濁世誰知己。仙史狂生兩可人。鄭虛一云。難得鍾朱雙管筆。詩情畫意妙傳神。甯偶齋云。千秋難得雙知己。今有朱公古李公。張敬之云。鍾氏丹青朱氏筆。奇才相遇賞心同。此自是作者雙管齊飛處。僕何敢當。惟有企慕不已耳。

湯雨蒼云。倘使楊公無暮氣。蛾眉深鎖畫堂春。王雪禪云。狡鳳囚鸞如察察。肯容五夜美人逃。劉仲博云。兄妹相逢深結納。英雄誓嫁不糊塗。暮氣卽糊塗也。如察察。斯不糊塗矣。令公則太糊塗。一妹則太不糊塗。于此可卜人之成敗。

楊橫山云。却怪虞姬偏不武。奪來慧劍斬愁魔。郭竹書云。吾笑綠珠無慧眼。墜樓終不足驚人。抑此伸彼。無非爲紅拂張目。理或未必然。而文則不可無主賓也。

諸詞家所作。固多佳句。而予尤愛周劍文賀新郎一闕。有云。突狂妄。而今女士。鼓盪自由吹解放。究何會識得奇男子。亦不過盲從耳。又沈中路詩云。私奔成習慣。自謂合時宜。藉口爲紅拂。未免相其皮。吾願現代女界讀之一雪此恥。

顧韻夔云。贏得千秋名士筆。畫圖著意在雙眸。沈瘦石云。絕代風流堪羨處。英雄豪氣美人眸。劉鏡秋琴調相思引云。品花仙史。綵筆繪星眸。詩云。巧笑倩兮。美目盼兮。美人之美。固全在雙眸也。

嘗讀陶柴桑閑情賦云。願在裳而爲帶。束窈窕之纖身。願在莞而爲席。安弱體於三秋。願在絲而爲履。附素足以周旋等句。甘言媚辭。歎其癡絕。後世繡鞋錦瑟。由此濫觴。傅夢蝶云。癡情儂亦憐紅拂。願化輕紗護畫圖。竊得古人遺意。具有婉思。

凡作詩話。有以詩爲主者。有以話爲主者。以話爲主。詩未必佳。亦入之。以詩爲主。卽無話。詩佳必錄。予之詩話。固以話爲主者也。有明知其詩之佳。而於吾無話可入者。仍不入焉。且詩集後附詩話。與單行詩話不同。全詩具在。讀者開卷卽得。固無俟予之旁徵復列爲。

予少日好沈思。意氣甚豪。舉止疏放。動輒遭尤。今也衰頹日甚。無復當年意氣。凡事厭棄已盡。惟讀書結習未忘耳。誦唐李東川緩歌行云。早知今日讀書是。悔作從前任俠非。韋端己云。守道慚無補。趨時愧不臧。兩詩實獲我心。

予性寡合。不喜入詩社。故自立一社。名曰孤社。孤者孤也。別無社員。獨自操觚而已。粥叟宗文云。孤社南沙稱第一。苔岑聲氣一般同。所謂南沙孤社。子虛烏有。一經說破。靡不呼予爲滑稽之尤。

清山陰陳蓮塘所編唐人說薈內蚪髯客傳。作張說撰。而明陽山顧大有文房小說。則題爲杜光庭撰。宗子威詩云。大手筆會聊小試。却題道士杜光庭。指此。予案張杜皆僞託也。洪北江詩話云。唐杜光庭爲道士。撰集諸道經。多以己說參之。俗語稱杜撰。或以爲卽始於此。非也。顏氏家訓雜藝篇。江南閩里間。有畫書賦。乃陶隱居弟子杜道士所爲。其人未甚識字。輕爲軌則。託名貴師。世俗傳信。後生頗爲所誤。余意杜撰二字。蓋出於此。余嘗有消夏絕句云。不學兩道流。後先工作僞。然則題以杜光庭。意可知矣。野客叢書以杜撰屬諸杜默。尤謬。

湘潭郭智珠秉慧。著有紅薇吟館遺艸。卒年僅十八。紅拂云。英雄何處無知己。難得傾心是美人。山陰俞似音文淑過紅拂碑亭云。回首芳亭綺緒新。英雄不數藥師真。試看旖旎垂楊柳。青眼應憐陌上人。並載

閨秀詩話。郭詩意頗侷。俞作不著一字。可謂雅人深致。

湘潭周貽馨字茹馨。有詠孫夫人紅拂諸詩。亦閨秀詩話所云。惜原作無從一見。

近與康葆頤先生通問。承賜題兩章。方知君爲鍾氏宅相。述其家世甚詳。已錄入正編矣。並附重過外王父舊居漱石艸廬有感二首。亟爲附刊於此。以備稽攷。艸廬漱石命名奇。墨客閒招聚在斯。（居在召稼樓南里許。西小港東岸。）歎息騷壇人遽杳。淒涼舊業景全移。向隨阿母尋名蹟。（廬已載入南匯續志名蹟。）孰聽鄰翁說好詩。荒冢清明展拜罷。（墓在港西離舊居約百餘步。）故居重過不勝悲。文采風流安在哉。每從遺著譽奇材。（遺著曾由黃秦二公選入海曲詩鈔及梓鄉叢錄。）功名已薄觀題畫。（外王父題畫詩有好寫名山作臥游句。其志趣可知。）塊壘仍多欲借杯。京國昔曾勞遠夢。家山今祇賸餘灰。（廬外房屋洪楊時已付之一炬。）賈生未用身先卒。長使懷才淚滿顛。舊家喬木不勝今昔之感。若夫生不丁辰。懷才不遇。匪特爲里黨戚好銜悲。卽古今人所同慨也。然生平著作。倘獲流傳。猶勝於遭時而無所表見者。不可以道里計。予擬將先生漱石居詩詞稿重加輯錄。約康君等釀資刊傳。藉慰先哲地下之靈。聊盡後生之責。同志何在。是所願也。

太忙啓事

曩拙編五百家圓圈詩。匆促付印。原非本意。當日職務繁劇。恆於夜間封投馬路郵筒者。約計二三百冊。半被宵小所摸竊。故諸友好有接有未接。謗怨叢生。而予復懶於通問。意蚤遞到。迄今未與剖白。無從申辨。今紅拂詩仍照前例。託廣益書局出版。亦以書爲酬。不受稿費分文。選錄雖未十分苛嚴。似較圓圈爲整齊矣。除住址未詳。無從投寄。及名字籍貫不完者。暫不遞奉外。其餘賜題諸君。意欲遍贈。以贖前愆。未獲者煩爲輾轉相告。具函附郵來索。無不立寄。民國二十六年六月。南匯朱太忙謹啓。

(來函勿投廣益) 通訊浦東周浦鎮

紅拂續話

太忙補撰

今歲自新正迄今。臥病五月。爲時之久。數載未有。讀書功曠。悵慙何極。辛未所做先君子七十壽詩。已閱六載。近始略加甄錄。擬與黃花白羽圖題詞等。陸續製版刊傳。以完夙願。奈人事倣擾。養疴難靜。體屏意慵。胡能著述。拙輯紅拂偶錄。見聞固陋。遺漏甚多。倘蒙博雅同文。匡我不逮。代賜蒐錄。俾於再版時補入。曷勝榮幸之至。校刊將竣。覺詩話亦多漏落。爰補綴之。恐仍未盡。病中妄述無當。尚祈 閱者曲宥。丁丑六月。儲里大蹉跎生又識。

紅拂圖久尋不得。今夏於畫篋中忽檢獲。不啻久別重逢。如遇故人。因亟付景印。初攝嫌太狹小。重又展大。田嬾雲云。何不繙摹廣流布。好教人共賞芳姿。茲乃遵其旨也。

或云紅拂是私奔之王。然一般騷流墨客。徧徧諱言之。不以爲然。奚鐵棠云。保身明哲應如此。莫作人間奔女看。陳庶蕃云。雲雨巫山情意厚。無人譏議說荒唐。童和齋云。豈比文君甘失節。私奔原不是淫奔。前所舉頗有遺漏。故重述及此。

凡詩文不可以詞害意。是故文章之道。曲之又曲。最重在意。非重在詞也。徐肖慈云。名傳千載成佳耦。賴有蚪髻撮合功。淺人見之。必訝曰。明明是一妹撮合李張。何云蚪髻撮合也。不知此撮合。謂助李唐定天

下。非指撮合佳耦也。曠公質點絳脣云。不煩青鳥。一面甘偕老。正何賴於虬髯。然試思當日虬髯力能解散之。破壞之。而偏是深相結納。卽謂之有撮合功。有何不可。

徐一達云。女兒如此不虛生。有此賢夫有此兄。却與宗子威藥師夫婿仲堅兄句同。女子而能得萍水之夫。異族之兄如此。洵爲大幸福事。不虛此生矣。

鄭虛一云。莫作尋常兒女看。風塵有眼識英雄。有眼識英雄。不足爲奇。必也英雄在風塵之中。而有眼以識之。斯眼也。何眼也。寧不足異乎。錢靜方云。冷灘數載辱傾城。一眼何嘗顧俗儉。一眼與有眼二字。一樣響亮。

劉仲博云。慧眼早能知己覓。俠腸羞與美人同。美人襟尚。自與俠女之心差異。惟世間真正美人。亦與俠女行爲。不大相遠。劉君之詩。則指尋常美人耳。

姜仰山云。不是丹青稱妙手。朱公何自喜珍藏。鮑桂蓀云。不因慧眼能知李。何用徵求海內詩。藏畫徵詩之意。可謂兩得其蘊。詩云。他人有心。予忖度之。姜鮑有焉。

荆梧棲云。惹得朱公迎一舸。五都歸勝五湖歸。李穉生云。那及今朝老朱亥。收來一幅徧徵詩。田嬾雲云。羨他好事朱承爵。何待名姝始換來。王仁甫云。冷肆而今逢薛下。傾城絕代伴君歸。張卓人云。料得衛公

應見妬。如何豔福讓朱家。許圖南云。強爭豪奪凌千古。豔福平分一半兒。嚴幼廉云。紫陽何幸得此圖。文房樂事快心鏡。以上諸君之詩。亦羨我者。亟爲錄出。用補前編所遺。夫鏡裏鴛鴦。畫中寵愛。乃竟有爾許詞流。向我顛羨。倘果得美人而事之。瑯琊王不當情死耶。

楊卓人云。蛾眉若使英靈在。百世知音感有人。錢靜方云。氣挾冰霜貌灼花。俠魂當亦戀朱家。後人仰慕古人不知也。是以情之癡者。每有九京可作之思。童和齋云。詩徵萬首題紅拂。郵遞紛紛披感太忙。若楊君等詩。真是感予不淺。

私奔竟勝臨邛夜。豈是琴心挑逗來。楊雪門先生句也。爲李靖占得身分不少。李靖之身分高。而一妹之身分亦高。此私奔二字。却不礙眼。

楊仙洲點絳脣云。風清日皎。細訴柔情鼻。或曰柔情何能鼻。不知此處正妙在鼻字。用他字不得。

呂竹影君之作。首絕用意雖佳。竊意未敢贊同。前已言之。次絕云。名字無端喚出塵。紅塵不出定沈淪。則妙甚。今日女子有涉紅塵而沈淪者。若紅拂則必須出塵。方免沈淪。此真所謂拔苦海而登喬木者也。林壽卿云。眷懿侯門不夜行。長隨執拂枉生平。楊了公云。侯門如海深難見。祇是尋常執拂人。與呂君之意相近。而楊詩爲尤妙。

楊少梅云。鶯聲悄悄溫柔語。都被騷壇寫作詩。詞人善於描摹美人。此君却從詞人描摹之中。以寫紅拂。讀之愈覺雋永。

予題詞有不逢知己逢嬌女。紙上姻緣亦孔嘉之句。卽沈瘦石所謂畫裏尋知己。荆梧樓所謂買將駿骨也。曩自題肖影云。自恨鏡中尋賞識。寧期絃外覓知音。時至今日。依然狂奴故態。可勝感喟。

楊寶丞云。不是衛公才絕世。肯行多露夜深來。如可爲私奔者當頭棒喝。現代女子。豈一猛省而鑒諸。切勿輕於嘗試。誤適匪人。而貽終身之差。爲千古之恥。女同胞乎。戀愛其可輕談乎。

趙紹祖古墨齋金石跋。唐衛公李靖碑云。侯君集馬過朝門五步。而衛公知其必反。此非有他術。蓋讀禮而知之也。然則衛公學問之士。而世或以粗材目之。或以異人待之。皆過矣。楊卓人云。衛公豔福雖消受。但解藏嬌不解詩。觀趙氏之言。則衛公亦非不解人也。正未可藐視。

鄒燮元云。三更壯胆邀柔月。一片雄懷挽弱風。使吾國女子。有二三人。如紅拂紅玉。克佐功勳。則外患不足憂。弱女子之名。亦可以雪矣。予讀鄒君之詩。頗涉遐思。安知今世固必無其人乎。

今夏因文獻展覽會事。力疾洩瀉。攜去梓鄉文獻三百餘件。經審查後。遂以五十餘件送會。此屆吾邑出品。鄙人略占多數。予喜蒐讀女子詩集。間至蠅隱廬。見季齋集中。有三紅行一篇。亟購歸之。係單縣劉恪

簡公峨之女孫劉琴宰女士所著。詩頗高古。卒年祇二十有一。其壻錢塘臚雲仙吏黃右爰撰悼亡百絕。附刊集後。三紅行今不及入紅拂偶錄。聊記於此云。釵蟲影裏劍光起。世間乃有此女子。美人從古愛紅紅。綃耶拂耶線尤美。金甌玉箸緋林進。臨行暗指胸前鏡。第三院裏五更風。脫身猶把崑崙倩。何似楊家執拂人。杖囊徑自出侯門。妝成暗識虬髯客。安穩隨郎住太原。一身自了人不知。龍紋匕首掛胸時。牀頭金合從容取。夢魘田家外宅兒。夜漏三巡七百里。銅臺斜月漳流水。河南河北釋干戈。飄然遁跡空羅綺。朝陽歌罷最銷魂。十九年前賣藥人。當時綃拂應羞死。可解艱難報主恩。夫主人夙無恩寵於僕。而欲責僕以報主難矣。

予曩有自題黃花白羽圖小影七律。撰至五十餘篇之多。中有一篇云。性靈富足自經營。綺歲耽詩意緒縈。滅燭常憐明月好。添香每惜曉風輕。淵材五恨元無謂。平子四愁恰有情。醞籍不爲狂宋玉。束身名教且孤行。詩雖不佳。錄之亦足以見今日之太忙。與廿年之太忙。依然迂拙萬分。未若人之善變也。圓圈紅拂兩集。雖已付刊。尙欲徵求。擬出續集。絳帳悼蓮集亦已編就。因須徵詢家屬。然後付印。現從事搜輯沈萬山軼事小青漫錄兩書。尙蒙大雅君子。博我以見聞。何幸如之。請先錄目以示。凡所未備者。然後請益。庶免重複。徒煩鈔繕耳。

潛邱劄記云。或問古學以何爲難。曰不誤。又問曰不漏。予謂不漏不誤。精博二字可以盡之。古今學人博者至少。精者尤罕。拙製詩文。都無是處。信筆亂塗於零星舊簿。向不愛惜。今夏表阮張君維豐來舍學習。因囑略加彙錄。忽見舊撰圓圈詩二絕。爲曩日漏刊。殊自訝惑。又有讀硯畦丈題紅拂詩有感次韻却寄一律。亦忘附集中。因輔錄於此云。侯門幽怨舊朝空。眉黛依然媚遠峯。運去漫言詩似虎。狂來祇覺酒如龍。無人肯顧知奇貴。有美相逢慰寡悰。遲暮更教丁叔季。不堪惆悵語芙蓉。已作尙漏。何妨古集。秦丈之作。原有所指。拙詩既平凡。亦不自知意旨所在。祇見微感觸耳。予待旦讀書。常若有所遺忘。每欲鉤稽博徵。而意緒紛煩。恆苦師友之少。精力衰頹。難悉從事。近作姚氏叢刊總跋。拉雜成文。語已冗長。然今讀晚學齋文集。竟未述及姚宏緒所編姚氏一家詩文集。至一百三十九卷之多。又賴布衣一則。是乃大漏也。甚矣不漏不誤之難。古人豈欺我哉。學問之道。寧有涯涘。而世之人士。每自詫其學業精純。橫絕一世。無復需麗澤之求。奇編之覓。意常優足何耶。

紅拂詩話補遺

近閱新羅山人離垢集五卷。爲華榕軒大令所刊。江陰顧師竹序云。古今諸體。如氣之秋。如月之曙。性情所至。妙不自尋。而後知山人一生實以詩鳴。畫猶緒餘耳。其題李靖虬髯公云。拋擲兩丸無息機。九州膏乳自空肥。乾坤浩浩人如虱。誰識英雄在市衣。太忙案。古今來名畫家必擅三絕之長。此其所以使人尤爲推崇。惟未深曉者。定必祇知其一而忘其他矣。集名離垢殊雅。本應收麗紅拂偶錄。茲已不及。故附於詩話中。

予所著太忙通俗艸中。尙有關涉紅拂之作三絕。比加整釐。始行發見。已不及入題詠集。故亦附於詩話焉。或疑予紅拂詩中巍字誤者。詩以示之。說文而外參同契。葉適編中更漢碑。太息韻書俱失載。閒翻字典幾家疑。清字典謂巍無去聲。

上海图书馆藏书



A541 212 0022 1010B

紅拂集補遺

二

誤。蛾眉云。古今孰似出塵奇。夜坐樓中有所思。人比蛾眉更善妬。憐才那得到
蛾眉。紅拂云。知音全不藉瑤琴。慧眼如君冠古今。底事冬烘重耳食。虛榮心比女
兒深。詩本不見超邁。而意尙感慨。倘讀者亦有餘味可尋乎。

上海
 百新書店
 支店 中環 大馬路 香港 德輔道
 PAH SIN BOOK SHOP
 HONGKONG BRANCH

民國二十八年一月再版

私奔紅拂集

洋裝一册 實價一角六分

編者 朱太忙

出版者 廣益書局

總發行所 上海河南路 廣益書局

一三七號

分發行所

廣州 南京 南昌 漢口 重慶
 長沙 北平 開封 萬縣 成都

廣益書局

2000

